

Siunnersuummut oqaaseqaatit

Nalinginnaasunik oqaaseqaatit

1. Aallarniut

Takornariartitsisarnermut akuersissuteqartarneq pillugu inatsisip 2012¹ -imi pilersinneqarnerata tunuliaqutaraa piffissamut ungasinnerusumut isigisunik takornariartitsisarnernut atatillugu aningaasaliissuteqartarnermi atugassarititaasunik pitsanngorsaaniarneq. Aningaasaliisoqarneratigut ingerlatsinerit annertunerulissapput sumiiffinnilu ineriartortitsissallutik. Sumiiffinni kisermaassilluni, tassa neqerooruteqarsinnaasut allat neqerooruteqarsinnaangippata, ingerlatsisinnaaneq aqputigalugu niuernikkut tunngaveqartumik ingerlatsisinnaaneq periarfissaalissaaq. Akuersissutit tunngavigalugit sumiiffinni allani takornariartitsisarnermut kiffartuussissutit assigisaannik neqerooruteqarsinnaaneq killilersorneqanngilaq.

Inatsisartut inatsisaat kingornagut 2015² -imi allanngortinneqarpoq. Allannguinerup siunertaraa takornariartitsisarnermik ingerlatsisarnermut atatillugu qinnuteqartitsisarnerit assigiissaarneqarnissaat pisariinnerulersinnissaallu. Assigiissaarinerup tamatuma ilagaa atuuffiusinnaasup annertunerulersinneqarnera, taamaalilluni sukisaarsaatigalugu eqalunniartartut inatsimmi ilanngunneqarmata. Suliassaqaarfik taanna siusinnerusukkat immikkut Inatsisartut inatsisaatigut³ aalajangersarneqarsimagaluarpoq. Taakkua saniatigut Inatsisartut inatsisaat 2015-imeersumi Naalakkersuisunik immikkoortumut pilersaarummi sumiiffinnik takornariartitsiviusartunik aalajangersaasarnermik, kiisalu ingerlatsinerit qanoq ittut akuersissummi ilaasarnissaannik pisinnaatitaapput.

2022-mi Nunanut Allanut, Inuussutissarsiornermut Niuernermullu Naalakkersuisoqarfiup sumiiffinnut aalajangersimasunut takornariartitsisarnermut akuersissuteqartarnermut Inatsisartut inatsisaannik allannguinnissamik siunnersuusiorneq aallartippaat. Allannguinermi akuersissuteqartarnernut suliaqarnernut atatillugu kommunit peqataatinneqarnerulernissaat siunertaavoq. Siunnersuut tamanut ammasumik tusarniaassutigalugu nassiunneqarpoq

¹ Sumiiffinni nunami aalajangersimasuni takornariartitsisarnermut akuersissuteqartarnermut pillugu Inatsisartut inatsisaat nr. 19, ulloq 3. December 2012-imeersoq.

² Sumiiffinni nunami aalajangersimasuni takornariartitsisarnermut akuersissuteqartarnermut pillugu Inatsisartut inatsisaat nr. 19, 3. december 2012-imeersup allanngortinnissaa pillugu Inatsisartut inatsisaat (Inatsisip atuuffigisaa sukisaarsaatigalugu aalisarnermut akuersissutinut sumiiffikkaanullu pilersaarutinut piginnaatitsissummik ilaqartilirlugu annertusissaaq)

³ Sukisaarsaatigalugu aalisartunik aalisartitsisarnermut akuersissuteqartarneq pillugu Inatsisartut inatsisaat nr. 20, ulloq 22. November 2011-imeersoq.

piffissami 31. maj 2023-imiit 28. juni 2023-imut. Tusarniaanermut atatillugu siunnersuummut oqaaseqaatinik tunngaviusunik arlaqartunik tigusaqartoqarpoq. Allanguutissatut siunnersuusionermi suliap qanoq angitiginera tassani paasineqarpoq, taamaattumik Inatsisartut inatsisissaannik nutaamik suliaqartoqarnissaa aalajangiunneqarpoq. Taamaakkaluartoq Inatsisartut inatsisissaattut suliaqarnermi nutaami suliaassaqarfik pillugu inatsisit atuuttut aallaavigineqarput, allanguutillu “2. Siunnersuummi immikkoortut pingaarnerit”-ni nassuiarneqarput.

2. Siunnersuummi immikkoortut pingaarnerit

2.1 Takornariartitsinermi neqeroorutinut kisermaassineq

Siunnersuummi ilaatigut Naalakkersuisut sumiiffiit ilaanni takornarissanut neqeroortigineqarsinnaasut pillugit kisermaassilluni ingerlatsisinnaanermut akuersissutinik tunniussinissamut aalajangersaasinnaalissapput. Tamanna pisinnaavoq Naalakkersuisut nalunaarummi malittarisassat malillugit sumiiffiit ilaanni kisermaassilluni ingerlatsisinnaanermut aalajangersaaneratigut, takornarissanut kiffartuussissutit pineqartut sumiiffimmi pineqartumi kisermaassilluni ingerlanneqarsinnaassapput.

Taamaattoqassappat sumiiffimmi takornarissanut ingerlatsisunut, soqutigisalinnullu allanut nalunaarut sumiiffimmi kisermaassilluni takornarissatut kiffartuussinissamik imalik tusarniaassutigineqassaaq, taamaaliortoqassaaq assersuutigalugu sumiiffimmi pilersaarutaareersumut arlaatigut oqaaseqaateqartoqarsinnaanissaa piniarlugu.

Sumiiffimmi immikkut toqqakkani takornarissanut neqeroorutit pillugit aalajangersaasoqarsimappat imaluunniit sumiiffimmi kisermaassilluni ingerlatsisoqartariaqarpat, taava Naalakkersuisut neqeroortitsisoqareernerata tusarniaasoqareerneratalu kingorna nalilersuineranut ataatsimiititaliamik pilersitsisinnaapput takuuk siunnersuummi § 9-mi suleriusissatut allassimasut, taanna malillugu takornariaqarnermut neqeroorut kisermaassilluni ingerlatsisinnaanermik pisinnaatitsinertalimmik tunniunneqarsinnaavoq. Taamaasilluni takornarissanut neqeroorut kiserlaassilluni ingerlatsinertalimmik akuersissutigineqassaaq.

Kisermaassilluni ingerlatsisinnmaatitaaneq pillugu Inuussutissarsionermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoqarfimmit arsaarinnissuteqartarneq eqqarsaatigineqassanersoq eqqarsaatigineqarsimavoq. Tunngaviusumik Inatsimmi § 73-imi imm. 1-imi allassimasut malillugit kinaluunniit pigisalik pigisaminik tunniussisussaatitaasinnaangilaq inooqatigiit ataatsimut piumasaqanngippata. Tamannalu taamaallaat inatsisitigut pisinnaavoq tamakkiisumik taarsiissuteqarnikkut.

Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalackersuisoqarfimmit paasinnittaasiat malillugu aaqqiissutissatut siunnersuutaasumi tunngaviusumik inatsimmi § 73-imi illersorneqartoq inummut aammalu inummut inatsisinut attuumassuteqartumut sumiiffimmi takornarissanut neqerooruteqarsinnaanermut inatsisitigut pisinnaatitaaffilik, kisermaassilluni ingerlatsisinnaaneq tunngavigalugu piumasaqateqarfigineqalersoq sunnerneqarsinnaavoq. Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalackersuisoqarfimmi paasinnittaaserineqartoq malillugu iliuserineqartussat Tunngaviusumik inatsimmi § 73-imi allassimasut malillugit arsaarinnissutaasartunut attuumassuteqarnaviannigillat.

Taamaattumik siunnersuummi inatsisit atoreersut atuinnarlugit ingerlatsisoqarnissaa pingaartinneqarsimavoq, aammalu siunnersuummi sumiiffiit immikkuullarissut aalajangersaaffiginiarneqarput, soorlu akiliilluni piniartitsiffiusartut aammalu sumiiffiit piffissami killiligaasumi, annertunerusumik ukiuni marlunni, sivitsorneqarsinnaasumilli akuersissummik tunniussiffiusartut. Taakkua saniatigut sumiiffiit nutaat akuersissummik tunniussiffiusinnaasut tusarniaassutigineqassapput, taakkunungalu soqutigisallit oqaaseqateqarsinnaapput, tassunga ilanngullugu sumiiffimmi pineqartumi takornarissanut neqerooruteqartareersut. Tamanna isumaqarpoq sumiiffimmi akuersissummik tunniussisoqarniartillugu takornariaqarnermut neqeroorutaasut atuuttut sumiiffimmilu neqeroorutaasut isiginiarneqassasut. Taassumalu saniatigut siunnersuummi pingaartinneqarpoq sumiiffiit assersuutigalugu akiliilluni piniartitsiffiusartut kisermaassilluni ingerlatsivissatut akuerineqassanngitsut, siunnersuummittaaq aamma sumiiffimmi allami akiliilluni piniartitsisarneq atulersinniarneqanngilaq. Siunnersuummittaaq § 8-mi piumasaqaatini allassimasunit immikkut akuersissuteqarsinnaaneq allassimavoq, taannalu sumiiffimmi killilikkami takornarissanut kiffartuussisinnaanermut attuumassuteqarpoq, taamaaliortoqarsinnaavorlu Tunngaviusumik inatsimmi § 73-imi allassimasut malillugit arsaarinninnissamat tunngatillugu piumasaateqartoqarsinnaatillugu.

Taamaakkaluartoq siumut oqaatigineqareersinnaanngisaannarpoq pisuni immikkuullarissuni takornarissanik sullissisut ataasiakkaat pineqartillugit annertuunik sunnerneqarnikkut arsaarinninnermik oqaaseqartoqarsinnaanissaa. Tassunga peqqutaavoq arsaarinnissuteqarnermut tunngatillugu ataasiakkaat nalilersorneqartariaqarmata, taamaaliortoqassappallu ilaatigut suliffeqarfinnut ataasiakkaanut paasissutissat misissorneqartariaqarput. Taamaattumik inatsimmi arsaarinnissuteqartoqarsinnaanera siunertaanngikkaluartoq immikkut akuersissuteqarsinnaaneq ilanngunneqarsimavoq. Iliuseqarneq piumasaqaatit aallaavigalugit arsaarinnissutaasutut naleqassappat, pineqartoq ilaannakortumik tamakkiisumilluunniit taarsiiffigineqarnissaminut piumasaqarsinnaavoq. Pisoq pillugu ingerlatsisut eqqartuussivimmud suliasanngortitsisinnaapput.

Siunnersuut aallaavigalugu takornarissanut neqerooruteqarsinnaanermut akuersissutinik neqeroortitsisoqarnerani qinnuteqartoq akuersissummik tunineqarsinnaassaguni siunnersuummi §§ 12-imiit 15-imut piumasagaatit allassimasut naammassisinnaasariaqarpai aammalu § 16-imi allassimasut aamma naammassisinnaasariaqarlugit. Piumasagaatit naammassineqarsinnaanngippata qinnuteqaat itigartitsissutigineqassaaq.

Neqeroortitsisoqarnerata kingorna qinnuteqaatinik nalilersuinermi Naalackersuisut Inatsisartut inatsisaanni matumani § 10-mi piumasagaataasut aammalu minnerpaamik § 11-mi piumasagaataasut tunngavigalugit aalajangiissapput.

Neqeroortitsisoqarsimaguni, tassanilu takornarialerisunut akuersissummik piumasagaatinik naammassinnittunik akuersissummik tunniussisoqarsinnaasimanani, taava nutaamik neqeroortitsisoqanngikkaluarluni, sumiiffimmi takornarissanut neqeroortitsisinnaanermut akuersissummik tunniussisoqarsinnaavoq. Taamaattoqassagaluarpalli, qinnuteqaat qinnuteqarnissamut killiliussaq annerpaamik qaammatit 18-it qaangiutsinnagit tunniunneqarsimasariaqarpoq.

Tamatuma kingorna takornariartitsisinnaanermut akuersissut aallaavigalugu pisinnaatitsissut tunniunneqartoq assigiinngitsunik pisussaaffilersorneqassaaq, takuuk siunnersuummi § 17-18-imi allassimasut, soorlu aamma takornarissanut neqerooruteqarsinnaanermut akuersissummik tunineqarsimasut ukiumut akitsuummut akiligassaat § 20-mit 23-mut allassimasut akilerneqartassasut.

Siunnersuut malillugu Naalackersuisut takornarissanut neqerooruteqarsinnaasut akuersissummik pisinnaatitsissummillu pillit nakkutigiumaarpaat, soorlu aamma Naalackersuisut inatsisartut inatsisaat una atorlugu pisinnaatitsissummik pillit allallu unioqutitsisoqartillugu aaqqiissuteqaqquneqarsinnaasut imaluunniit taamaatitsisinnaasut.

2.2 Nalilersuinermit ataatsimiititaliamik pilersitsineq

Takornariaqarnermut neqeroorsinnaanermut akuersissummik tunniussisoqassatillugu kommunimi akuersissuteqarfiusussami siunnersuut tunngavigalugu Naalackersuisut nalilersuinermit ataatsimiititaliamik pilersitsisinnaapput. Nalilersuinermit ataatsimiititaliamik pilersitsisarnissap siunertaa tassaavoq takornarissanut akuersissutinik suliaqartoqartillugu kommunimit sumiiffimmiillu peqataatitsinerunissaq.

Naalackersuisut nalilersuinermit ataatsimiititaliami ilaasortanik toqqaasoqarsinnaanerannut, siulittaasumik toqqaasinnaanissaannut kiisalu nalilersuinermit ataatsimiititaliami taasisariaasissaq pillugu malittarisassiortoqarnissaa siunnersuutaavoq.

2.3 Suliassanut oqartussaannermik kommuninut suliassanngortitsisinnaaneq

Siunnersuut aallaavigalugu takornarissanut neqerooruteqarsinnaanermut akuersissutinik tunniussisoqarnissaanut suliaqartoqartillugu Naalakkersuisut kommunimut suliassanik ingerlatsitseqqiisinnaanerannik allassimasoqarpoq. Siunnersuummi allassimavoq nakkutilliineq pisorta qarfinnut suliffeqarfinnulluunniit allanut Namminersorlutik Oqartussat kommunillu ataanniittunut suliassanngortinneqarsinnaasoq.

2.3 Toqqaanermi piumasaqaatit aamma qinnuteqartunut piumasaqaatit

Sumiiffinni nunami aalajangersimasuni takornariartitsinermut akuersissuteqartarnissaq pillugu Inatsisartut inatsisaat atuuttumi piumasaqatinut tunngatillugu oqaatsitigut allannguinnissaq siunnersuutaavoq. Siullertut qinnuteqartup suliamut piginnaanerisassaanut aamma aningaasatigut tunuliaqutarisaanut tunngatillugu erseqqissaasoqarpoq. Tamatuma saniatigut siunnersuummi akuersissummik tunineqarnermi suliniutip pineqartup Kalaallit Nunaanneersunut suliffissaqartitsinera aammalu kalaallinik nioqquteqartartunik kiffartuussisartunillu atuinissaata nalilersorneqartussaanaera ersarissarneqarpoq.

Qinnuteqartumik nalilersuinissamuttooq qinnuteqartup akuersissuteqarfigilersinnaasamini sumiiffimmi tamakkiisumik ilaannakortumilluunniit ingerlatsinera imaluunniit pilersaarusiaa aalajangersimasut qanoq ussassaartuginiarnerai, neqeroortuginiarnerai, tunniunniarnerai ilanngunneqassapput. Taamaaliormi neqerooruteqartitsinnginnermi qinnuteqartut sumiiffimmi ingerlatsereersut, neqeroortitsisoqarnerani qinnuteqarusuttut, iluaqutissaqassapput.

Tamatuma saniatigut piumasaqaatini § 10-mi imm. 1-imi nr. 5 aallaavigalugu piujartitsinermut attuumassutilimmik aalajangersaapput. Piujuaannartitsineq ima paasineqassaaq: “pinngortitamik, avatangiisinik, silaannarmik, sulinermik inuussutissarsiortut pisinnaatitaaffiinik inuiaqatigiinnilu isiginiagassanik soqutigisanik nalinginnaasunik mianerinninneq illersuinerlu.”

Kapitalimittaaq allassimavoq Naalakkersuisut neqeroortitsinermut atatillugu piumasaqaatit minnerpaaffissaannik aalajangersaasoqarsinnaasoq, taakkualu qinnuteqartup naammassisinnaagunigit aatsaat akuersissummik tunineqarnissamut periarfissaqassalluni.

Akuersissuteqarnermut atatillugu Naalakkersuisut pisinnaatitsissummik piginnittumut malittarisassiorsinnaapput, taakkualu aallaavigalugit kalaallinik sulisoqarnissaq, aammalu kalaallinit nioqqutissanik pilersuisoqarnissaq kiffartuussisoqarnissarlu piumasarineqarsinnaavoq.

Takornarissanut neqerooruteqarsinnaanermut akuerissummik tunineqarnissamut piumasaqaataavoq inuk imaluunniit inatsisitigut inuk akuersissummik tunineqartussaq

Naalakkersuisunut 100.000 kr.-inik qaffasinnerusumik akiitsoqannginnissaa. Piumasaqaalli naammassineqarsimasutut isigineqassaaq akiliinissamut isumaqatigiissusiortoqarsimappat, isumaqatigiissutaasullu eqquutsinneqarpata.

Takornarissanut neqeroorsinnaatitaanermut inuit akuersissummik tunniussinissamut pineqartup Kalaallit Nunaanni inuit allartorsimaffianni nalunaarsorneqarsimanissaannut piumasaqaatip sakkortusinissaa siunnersuutigineqarpoq, taamaalilluni akuersissummik taamaallaat tunineqarsinnaasut tassaassallutik inuit Kalaallit Nunaanni inuit allartorsimaffianni ukiuni 5-ni nalunaarsorneqarsimasut. Taamatut aalajangersaanerup kingunerisaanik aamma aningaasaliissutissanut piumasaqaammik siunnersuummi § 13, imm. 1, nr. 3-mi allassimasut malillugit inissiisoqarpoq, tassanilu allassimavoq ingerlatseqatigiiffiup nammineq aningaasaataasa affai sinnerlugit toqqaannartumik toqqaannanngitsumilluunniit inuit piginnittuusut § 12-imi allassimasunik naammassinnissasut kiisalu taasisinnaasut affai sinnerlugit toqqaannartumik toqqaannanngitsumilluunniit § 12-imi allassimasunik aamma naammassinnissinnaasasut. Tamannalu aamma § 13, imm. 1, nr. 4-mi allassimasunut aamma atuuppoq.

2.5 Takornarissanut neqerooruteqarsinnaanermut akuersissummik tunineqarsinnaanermut piumasaqaatit

Takornarissanut neqerooruteqarsinnaanermut akuersissummik tunineqassagaanni piumasaqaatit assigiinngitsut naammassineqarsinnaanissaat siunnersuutigineqarpoq.

Siunnersuummi § 10-mi piumasaqaatissatut allanneqarsimasut aammalu § 11-mi minnerpaamik piumasaqaatit naammassineqartariaqartut naammassisimagaanni taamaallaat akuersissummik tunineqarsinnaanernut eqqarsaatigineqarsinnaavoq.

Piumasaqaatit pineqartut pisinnaatitsissummik tunineqartup sillimaniarnermut pilersaarussiaanut aammalu qularnaveeqqutip annertussusaanut allatigulluunniit sillimaniarnermut attuumassuteqarput. Ilaatigut siunnersuummi § 16-imi allassimasut malillugit Naalakkersuisut aalajangersaasimatillutik sulisunik pilersuisunilluunniit kalaallinik atuinissaq piumasaqaataasinnaavoq.

Piumasaqaatit naammassineqarsimanngippata, takornarissanut neqerooruteqarsinnaanermut akuersissuteqarnissamut qinnuteqaat itigartitsissutigineqassaaq. Pisunili immikkuullarissuni Naalakkersuisut siunnersuummi § 8-mi allassimasut aallaavigalugit immikkut akuersissuteqarsinnaapput.

Piumasaqaatit piffissami akuersissuteqarfiusumi tamani naammassineqarsinnaassapput.

2.6 Immikkut akuerineqarsinnaaneq

Inatsisartut inatsisaanni §§ 12-imit 15-imut aammalu §§ 17-imit 18-imut kiisalu Inatsisartut inatsisaanni matumani piumasaqaataasutut allassimasut pillugit Naalakkersuisut immikkut akuersissuteqarsinnaanerannut siunnersuusiortoqarsimavoq.

Immikkut akuersissuteqarsinnaaneq ilanngunneqarsimavoq piginnaatitsissummik pigisallit allaffissornikkut aningaasatigullu eqqarsaatigineqarnissaat pillugu.

Assersuutigalugu Naalakkersuisut immikkut akuersissuteqarniarneranni isiginiarneqarsinnaasut tassaapput, takornariaqarnermik suliaqartoq takornarissanik sullinerminut atillugu sulisukinnera, ilinniarnerninut napparsimanerminulluunniit atatillugu nunani allamiittariaqarnera, imaluunniit nalinginnaasumik akuersissuteqartoqassappat suliaqartoq allaffissornikkut aningaasatigullu annertuumik nammakkerneqarsinnaanera. Assersuutit taaneqartut kisiisa aallaaviussanngillat.

Takornarissanut neqerooruteqarsinnaanermut akuersissut aallaavigalugu piginnaatitsissummik pilik piffissap ingerlanerani, pisinnaatitsissummik pigisallip atugarisaatigut allanngortoqartillugu, immikkut akuersissummik qinnuteqarsinnaavoq

2.7 Akuersissummik tunineqartarnej piffissap akuersissuteqarfiusimasup naareernerani
Piffissaq akuersissuteqarfiusoq naagaangat, akuersissummik nutaamik neqeroortitsisoqartussaanaera erseqqissarneqarsimavoq. Pisinnaatitsissummik piginnittuusimasoq akuersissummik tunineqaqqissinnaavoq, neqeroortitsinermi piumasaqaataasut aallaavigalugit nalilersuineq malillugu.

2.8 Piffissaq akuersissuteqarfiusartog

Siusinnerusukkut akuersissummik tunniussiniarnermi ukiut tallimat angullugit sivissusilimmik tunniussisarnej atorneqartarsimavoq. Siunnersuummilu matumani ukiunut 10-nut sivitsorneqarpoq. Tamatumalu saniatigut akuersissut ukiunik 20-nik sivitsorneqarsinnaanera ilanngunneqarsimavoq, taamaaliortoqarsinnaavorlu suliassanut pilersaarutaasut kiisalu aningaasatigut sinneqartoornissamut periarfissaasut aallaavigalugit. Massakkumut ukiut akuersissuteqarfiusinnaasut 30-usut attatiinanrneqarnissaa siunnersuutigineqarpoq. Taamaalilluni takornarissanut neqeroorsinnaanermut akuersissutit ukiut 30-t sinnerlugit atuutsinneqarsinnaassanngillat. Tamatuma kingorna akuersissutit neqeroorutigineqaqqaartariaqassapput.

2.9 Takornarissanut neqerooruteqarsinnaanermut akuersissummik tunniussisoqarnerani pisussaafit

Siunnersuummi takornarissanut neqerooruteqarsinnaanermut akuersissut aallaavigalugu pisinnaatitsissummik tunineqartoq assigiinngitsunik pisussaaffinnik naammassisariaqagaanik peqarpoq.

Pisinnaatitsissummik piginnittoq ilaatigut suliaminik aallartitsigani akuersissut aallaavigalugu takornarissanut neqeroorutigisassani pillugit ingerlatsinissamut pilersaarusiortoqartariaqarpoq, taannalu Naalakkersuisunit akuerineqassaaq.

Aalajangersakkami Naalakkersuisut ingerlatsinissanut pilersaarusiamik akuersissuteqartussaananeratt annertusineqarpoq, massakkullu naapertuussusaa aallaavigalugu sumiiffinni immikkut toqqakkani takornariartunut kiffartuussinernik ingerlatsinissamut akuersissuteqartarneq pillugu Inatsisartut inatsisissaat malillugu suut imarineqassanersut allanneqartussanngorluni.

Nalunaaruteqarnissamut aalajangersakkat aallaavigalugit sumiiffinni immikkut toqqakkani takornariartunut kiffartuussinernik ingerlatsinissamut akuersissuteqartarneq pillugu Inatsisartut inatsisissaanni atuuttumi ersarissarneqarpoq, nalunaarusiorneq ukiut tamaasa pisassasoq. Taakkua saniatigut nalunaarusiornermut tunngatillugu Naalakkersuisut aalajangersaasinnaalerput, nalunaarusiornermi paasissutissat suut nalunaarutigineqassanersut qanorlu akulikitsigisumik nalunaarusiortoqartassanersaq.

Tamatuma saniatigut nalunaarusiani paasissutissat tunniunneqartut Naalakkersuisut oqartussaqaarfimmut allanut Namminersorlutillu Oqartussat ingerlatsiviutaannut avitseqaqartarsinnaanerannik aalajangersaasoqarsimavoq.

Ilanngullugulu akuersissutit pillugit naatsorsuusiornernut tunngatillugu Naalakkersuisut paasissutissanik saqqummiisinnaanerannut aalajangersaasoqarsimavoq.

2.10 Nakkutilliineq

Nakkutilliinermut tunngatillugu umiiffinni immikkut toqqakkani takornariartunut kiffartuussinernik ingerlatsinissamut akuersissuteqartarneq pillugu Inatsisartut inatsisissaanni atuuttumi allannguisoqarsimavoq. Nakkutilliinermut atatillugu nakkutilliisutut oqartussat illuutitut il.il. isersinnaaneratt eqqartussivitsigut akuerisaanngitsumik peerneqarpoq. Taakkualu saniatigut nakkutilliinermut atatillugu Naalakkersuisut aalajangersaasinnaalerput, taakkualu pisortaqaarfiit Namminersorlutillu Oqartussat Kommunillu suliffeqaarfiutaannut attuumassuteqartarput.

2.10 Akuersissummik utertitsineq

Inatsisartut inatsisaat malillugu peqqussuteqarneq aallaavigalugu Naalakkersuisut inatsisartut inatsisaat una malillugu akuersissutinik tunniussaminnik utertitsisinnaaneratt erseqqissarneqarsimavoq.

Ilanngulluguttaaq akuersissummik utertitsisinnaanermut ersarinnerusunik malittarisassiorsinnaanermut pisinnaatitsisoqarpoq.

2.12 Akitsuutininik inissiineq

Siunnersuummi pisinnaatitsissummik piginnittoq akuersissuteqarnermut atatillugu akitsuutininik akiliisussaananeranut tunngasunik ersarissaasoqarpoq. Taakkualu saniatigut akitsuutit annertussusaat pisariillisarneqarsimalluni. Siornatigut sumiiffiit akuersissutillu sivisussusaat aallaavigalugit annertussuseq allanngorartinneqarsimavoq. Taakkualu saniatigut akuersissutit suussusaat aallaavigalugit annertussuseq aamma allanngorarsimalluni. Allaffissornikkut suliat annikillisarnerlugit assigiissaariniartoqarsimavoq. Taakkua saniatigut akiliilluni aalisartitsisarnermut akuersissutinillu allanut assigiinngissutsit atuutsiinnarneqarput. Assigiinngissutsit taakkua inatsimmi atuuttumi aamma atuupput.

3. Aningaasaqarnikkut aamma allaffissornikkut pisortanut sunniutissai

Siunnersuut tunngaviummik aningaasaqarnikkut aamma allaffissornikkut pisortanut sunniuteqarnissaa naatsorsuutigineqanngilaq.

§ 9-mi imm. 2-mi allassimasut malillugit sumiiffinni akuersissuteqarfiusartuni neqeroortitsinikkut siusinnerusukkut akuersissuteqarfiusimannngitsunut tunngatillugu allannguinerit allaffissornikkut sipaaruteqarfiusinnaapput. Sumiiffinnut taakkununga oqimaatsunik allaffissornikkut neqeroortitsisoqannginnissaa sipaarutaasassaaq.

Akitsuutininik inissiinissamut allannguutit Siunnersuummut aningaasaqarnikkut sunniuteqarnissaa naatsorsuutigineqanngilaq. Uanili piffissat akuerissuteqarfiusut assigiinngillat, Siornatigut sumiiffik sivisunerusumik ingerlatsiviusimagaangat akitsuut qaffasinnerusarsimavoq. Allallu akuersissummik sivikinnerusumik peqarsimasut annikinnerusumik akitsuuteqartarsimallutik. Akitsuutit annertussusaa siornatigut akitsuutinut akiliutaasartumut sanilliullugu siunnersuummi akunnattumut inissinneqarsimavoq. Maannakkumut akiliilluni piniartitsisinnaanermut 11-nik akuersissuteqartoqarpoq, nannunik takornariartitsinissamut akuersissut ataaseq tunniunneqarsimavoq kiisalu heliskiingimullu akuersissut ataaseq tunniunneqarsimalluni. Taamaattumik ingerlatsisut amerlanngillat, taamaattumik Nunatta karsiata isertitai siornatigormut sanilliullugu taamaaginnarnissaat naatsorsuutigineqarpoq.

Akitsuutit allaffissornikkut pisariinnerulersinneratigut pitsaasumik tamanna kinguneqassanganinneqarpoq. Tamannalu tunngavigalugu suliap suliarineqarnissai sivikinnerussanganinneqarlutik.

4. Aningaasaqarnikkut aamma allaffissornikkut inuussutissarsiortunut sunniutissai

Akuersissutit ukiunut 20-nut nalunaarutigineqarsinnaaneri, sulilu aamma ukiunik 20-nik sivitsuisoqarsinnaanera, taamaattoq suli annerpaamik ukiunut 30-nut tunniussisoqarsinnaanera, inuussutissarsiortunut pitsaanerusunik suliniutinut aningaasaliisoqarnissaanut periarfissiissasoq naatsorsuutigineqarpoq.

Akitsuutinut akiliutit aaqqiffigineqarneri, akuersissutit ingerlanneranut annertunerusumik sunniuteqarnissaat naatsorsuutigineqanngilaq, aamma aningaasat annertussusaasa annikinneri eqqarsaatigalugit. Akitsuutinut akiliutaasartut pisariinnerulersinneqarneri inuussutissarsiortunut pitsaasumik sunniuteqassasorineqarpoq, tassami sullinneqarneq sivikinnerulissagami.

5. Avatangiisinut, pinngortitamut aamma innuttaasut peqqissusiannut sunniutissai

Siunnersuut avatangiisinut, pinngortitamut aamma innuttaasut peqqissusiannut sunniuteqarnissaa naatsorsuutigineqanngilaq.

6. Innuttaasunut sunniutissai

Siunnersuut innuttaasunut sunniuteqarnissaa naatsorsuutigineqanngilaq. Sumiiffimmi pineqartumi akuersissuteqarnermut atatillugu piumasaqaatersuuteqaraluartoq innuttaasut malittarisassat nalinginnaasut malillugit sumiiffimmi piniarsinnaapput, aalisarsinnaapput pinngortitamiissinnaallutillu assigisaannillu. Kisermaassisussaatitaaneq taamaallaat atuutissaaq takornarissanut neqeroorteqarnermi, qulaanilu ingerlatsinerit taakkartorneqartut takornarissanut neqeroortitsinerimut attuumassuteqanngillat, inuk pineqartoq sammisassamik ingerlatsinissamut akiliisimasoq eqqaassanngikkaani.

7. Allatigut pingaaruteqartunik sunniutissai

Siunnersuut allatigut pingaaruteqartunik sunniuteqassanngilaq.

8. Tusarniaaneq pisortanik aamma kattuffinnik il.il.

Siunnersuut piffissami 29. apriili 2024 -miit 28. Maaji 2024 tusarniaassutigineqarpoq, tamanut saqqummiunneqarluni Namminersorlutik Oqartussat tusarniaasarnermut quppersagaanni, ukununngalu tusarniaavigisartakkanut nassiunneqarluni:

Naalackersuisut Siulittaasuata Naalackersuisoqarfia

Ineqarnermut Attaveqaasersuutinullu Naalackersuisoqarfik

Aningaasaqarnermut Akileraartarnermullu Naalackersuisoqarfik

Aalisarnermut Piniarnermullu Naalackersuisoqarfik

Isumaginninnermut, Ilaqutariinnermut, Suliffeqarnermut Nunamullu Namminermut

Naalackersuisoqarfik

Ilinniartitaanermut, Kultureqarnermut, Timersornermut Ilageeqarnermullu
Naalakkersuisoqarfik
Namminersornermut Nunanullu Allallanut Naalakkersuisoqarfik
Nunalerinertermut, Imminut Pilersornermut, Nukissiuuteqarnermut Avatangiisinullu
Naalakkersuisoqarfik
Meeqqanut Inuusuttunullu Naalakkersuisoqarfik
Peqqissutsimut Naalakkersuisoqarfik
Avannaata Kommunia
Qeqqata Kommunia
Qeqertalik Kommunia
Kommuneqarfik Sermersooq
Kommune Kujalleq
Sulisitsisut / Grønlands Erhverv
Sulinermik Inuusutissarsiuteqartut Kattuffiat (SIK)
Akademikernes Sammenslutning i Grønland (ASG)
Lærernes Fagforening i Grønland (IMAK)
Nunatsinni Perorsaasut Kattuffiat (NPK)
Peqqinnissaq Pillugu Kattuffiat (PPK)
Kalaallit Nunaanni Aalisartut Piniartullu Kattuffiat (KNAPK)
Avannaata Erhverv
Qeqertalik Business Council
Arctic Circle Business
Sermersooq Business
Innovation South Greenland
Kommunit Pilersaarusionertermut Oqartussaasui
Explore North Greenland
Destination Arctic Circle
Sermersooq Business
Innovation South Greenland
Destination Diskobay
Eastgreenland.com
Visit Greenland
Nalik Ventures
Air Greenland
Nuna advokater
Arctic Law
Eqqartuussissuserisut / Advokatfirmaet Malling & Hansen Damm
Eqqartuussissuserisut / Advokatfirmaet Meinel
Eqqartuussissuserisut / Advokat Gedion Jeremiassen
Inuit Law

Eqqartuussissuserisoq / Advokat Naja Joelsen
Eqqartuussissuserisoq / Advokat Aviâja Helms
Eqqartuussissuserisoq / Advokat Marie Louise Frederiksen
Kukkunersiuisut / Grønlands Revision
Kukkunersiuisut - Deloitte
EY
BDO
Air Greenland
Grønlandsbanken
Banknordik

Taakkua saniatigut tusarniaassutigineqartut takornarialerisunut akuersissutinik pigisaqartunut nassiunneqarsimapput.

Tusarniaanermi akissuteqaatit tiguneqartut aamma Naalakkersuisoqarfiup taakkununga isummersuutai tusarniaanermut atatillugu allakkiamiipput ilanngussami 1-imi.

Siunnersuummi aalajangersakkanut ataasiakkaanut oqaaseqaatit*§ 1 -imut*

Imm. 1

Aalajangersakkami allassimavoq siunnersuut takornarissanut neqeroortitsinissamut akuersissutitut attuumassuteqartoq. Taannalu aamma pisinnaatitsissutinik piginnittunut takornarissanullu neqeroorutaasartunut una attuumassutilinnut atuutissaaq. Siunnersuummi taaguutit siunnersuutip § 2-ani nassuiarneqarsimapput.

Imm. 2

Aalajangersakkami allanneqarsimavoq siunnersuut illulianut inissiaasunut, illulianut allanut, sanaartukkanut, aaqqissuussanut, aqqusinernut aamma attaveqaasersuutitut assigisaannullu atuutsinneqartoq. Takornarissanut neqeroortitsineq pillugu inatsisartut inatsisaat una atorlugu neqerooruteqarnermi, tuniniaanermi sullissinermiluunniit illuutit, aqqusernit, sanaartukkat allat assigisaallu nunaannarmiittut imaluunniit imartaniittut imaluunniit aningaasarsiornikkut Kalaallit Nunaata killeqarfiata iluaniittut aalajangersakkamut matumunnga ilaatinneqarput.

Imm. 3

Inatsisartut inatsisissaanni siunnersuutigineqarpoq, takornarissanik sullissisut sumiiffinni Takornariartitsinermut, sumiiffinni nunami aalajangersimasuni zone-nut agguasaarneq il.il. pillugu inatsisissatut siunnersuutaasoq malillugu akuersissutilinnut atuutsinneqassanngitsoq.

Soorluttaaq siunnersuutigineqartoq inatsisartut inatsisissaat una Takornariartitsinermut, sumiiffinni nunami aalajangersimasuni zone-nut agguasaarneq il.il. pillugit inatsisartut inatsisissaanni atuuffii sunnerneqassanngitsut aammalu sumiiffiit ilaat inatsit malillugu akuersissuteqarfusut tikinneqarnissaat killilersorneqarsimalluni.

§ 2 -mut

Imm. 1 -imut

Siunnersuut naapertorlugu takornariartutut isigineqartarpoq inuk angalasoq inuup pineqartup nalinginnaasumik najortakkami ineqarfigisamiluunniit avataanut, aammalu angalaneq tamarmiisoq taassumaluunniit ilaa nuannaarniutigalugu, qasuersaarluni imaluunniit sulinngiffeqarluni ingerlattaraa, tamatumunngalu atatillugu kiffartuussinernik pisiortortarluni. Takornariartoq kiffartuunneqarnerminut tamatumunnga akiliuteqartarpoq. Apeqquataatillugu kiffartuunneqarnerup qanoq ittuunera takornariap nioqqutit assigiinngitsut pisiarisinnaasarpai

imaluunniit atugassarilertarlugit nammineq, assersuutigalugu angalaarsinnaaneq imaluunniit sisorarsinnaaneq sumiiffinni immikkut ittuni, imaluunniit takornariatoq assiginngitsunik ingerlatsisinnaalluni piginnaatitsissummik pigisaqartoq peqatigalugu, imaluunniit taassuma sinniisua, ingerlatsinernik neqeroortoq, assersuutigalugu helikopterimik angalaarnerit.

Siunnersuummi allassimavoq angalaneq tamakkerlugu ilaannaaluunniit nuannaarniutigalugu, qasuersaarluni imaluunniit sulinnigiffeqarluni ingerlatissagaa. Tamanna isumaqarpoq inuk pineqartoq Kalaallit Nunaanut suliariorluni angalasoq, ullulli ilaanni nuannaarniutigalugu, qasuersaarluni imaluunniit sulinnigiffeqarluni angalasinnaasoq. Pineqartoq inatsisartut inatsisaat una malillugu angalanermini ullut suliffigisaanni takornarissatut isigineqassanngilaq. Taamaakkaluartorli ullut nuannaarniutigalugu, qasuersaarluni imaluunniit sulinnigiffeqarluni ingerlassinnaasaanni takornarissatut isigineqarsinnaassaaq, soorlu Kalaallit Nunaata pinngortitaanik uumasuinilluunniit nammineq nuannaarniutigaluguluunniit misigisaqarniaruni. Taamaattoqassappallu angalanerminut atatillugu pineqartoq kiffartuussissutinik pisisimassaaq.

Aalajangersakkami matumani siunnersuutaasumi taaguut takornariatoq aalajangersagaavoq immikkut ittumik neqerooruteqarnertut, neqeroorummi namminerimi aamma neqeroorutip ingerlanneqarnerani, ilaannikkut sumiiffinni immikkut ittuni, ilutigisaanillu qularnaarneqartarluni sumiiffimmi pineqartumi najugaqartut angalaarsinnaanerisa killilersorneqannginnissaa anguniarlugu. Takornarissamik taaguusiinerimi nunamut aalajangersimasumut najugaqarfimmulluunniit pitussimanngitsoq aalajangiunneqarsimavoq. Taaguusersuut naapertorlugu takornariartutut kiffartuunneqarnissamik, neqeroortumut akiliuteqarnikkut akileqquneqartumut isumaqatigiissusiorsimagaanni, taava nammineq najugarisap eqqaani takornariaasoqarsinnaavoq.

Imm. 2 -mut

Siunnersuummi takornarissanut neqeroorutitut taaneqartoq tassaavoq suliaq / ingerlataq takornarissanut akiliuteqarnikkut tunniunneqartoq. Takornarissanut neqeroorut assersuutigalugu ulluinnarlugu ingerlatsinerusinnaavoq, takornariartitsinerusinnaavoq, angallassinerusinnaavoq qimussiussinerusinnaallunilu. Takornarissanut neqeroorummi suliarineqartumut atatillugu tuniniaasoqarsinnaavoq soorlu atortussat, angallassineq, nerisassat, imeruersaatit unnuinerillu.

Imm. 3 -mut

Aalajangersakkami takornarissanut neqeroorutigineqarsinnaasunut akuersissut suusinnaanersoq aalajangersarneqarsimavoq. Akuersissummi sumiiffimmi killilersukkami takornariartitsinermut ataatsimik arlalinnilluunniit neqerooruteqarsinnaatitaaneq pineqarpoq. Akuersissut pisinnaatitsissummik piginnittumut siunnersuummi § 2-mi imm. 4-mi allassimasut malillugit nalunaarutigineqartarpoq.

Imm. 4-mut

Siunnersuut malillugu pisinnaatitsissummik piginnittoq inuusinnaavoq imaluunniit inatsisitigut inuussinnaavoq, taannalu akuersissummik nalunaaruteqarneq aallaavigalugu sumiiffimmi killilersukkami takornarissanut neqeroorummik aalajangersimasumik neqeroorsinnaanermut pisinnaatitsissummik pissarsitinneqarsimavoq. Akuersissuteqartoqarneratigut pisinnaatitsissummik piginnittoq assigiinngitsunik pisussaaffilersorneqartarpoq.

Imm. 5 -mut

Inatsisartut inatsisaat una naapertorlugu neqeroortitsinertut paasineqassaaq nalinginnaasumik tamanut ammasumik qinnuteqartitsineq takornariartitsisarnermut akuersissuteqarnissamut atatillugu ingerlanneqartoq. Takornarissanut neqeroorsinnaanermut akuersissuteqarnissamut neqeroortitsisoqartarneq siunnersuummi § 9-mi allassimasut malillugit aalajangersarneqarsimavoq.

Imm. 6-imut

Kalaallit sulisut siunnersuummi pineqartut tassaapput sulineramik inuussutissarsiteqartut Kalaallit Nunaanni inuit allattorsimaffianni allassimasut nalunaarsugaallutik.

Imm. 7-imut

Kalaallit pilersuisut Inatsisartut inatsisaat una naapertorlugu pineqartut tassaapput nioqquteqartartut / tunisaqartartut Kalaallit Nunaanni najugaqartutut nalunaarsorsimasariaqartut. Nalunaarsorsimaneq pineqartoq tassaavoq Qitiusumik Suliffeqarfinnik Nalunaarsuiffimmi (CVR).

§ 3 -mut**Imm. 1 -imut**

Aalajangersagaq aallaavigalugu sumiiffinni nunami aalajangersimasuni takornarissanut neqeroortitsinissamut Naalackersuisut akuersissuteqartoqartariaqarneranik piunasaqarnissamut aalajangersaasinnaanerat periarfissinneqarpoq.

Sumiiffik pineqartoq tassaasinnaavoq nunaminertaq pilerinartoq akiliuteqartitsisarnikkut piniartitsisarfit, sisorarfittut imaluunniit ingerlatassanut allanut, naatsorsuutigineqartoq takornariartitsisarnermik inuussutissarsiortut kaaviiartitsilluarnissaannut aqqutissiuussinnaasutut, ingerlatsisut immikkut atugassaqartinneqarnerisigut takornariartitsisarnermik tunisaqartarnikkut. Naalackersuisut aalajangersaasinnaappata akuersissummut piunasaqaatinik sumiiffimmut aalajangersimasumut, taava Naalackersuisut akuersissutinik neqerooruteqarsinnaapput neqeroortitsisarnermut aalajangersakkat

siunnersuummi kapitalimi 3-mi allassimasut naapertorlugit. Akuersissummik tunineqartoq imaluunniit tunineqartut sumiiffimmut killilimmut, taamaalillutik takornarissanut neqerooruteqarsinnaapput, taakkualu akiliteqartitsisarnikkut tunisaqartalersinnaapput. Naalakkersuisut akuersissummut atugassarititaasussanik sumiiffimmut pineqartumut atatillugu aalajangersaasimangippata taava takornarissanut neqeroorutaasoq pineqartumut piunasaqaateqassanngilaq, taamaalilluni sumiiffimmi pineqartumi takornarissanut neqeroorutaasoq siunnersuummi matumani aalajangersaaffigineqassanngilaq.

Ilaatigut ilanngunneqarsimavoq aalajangersaaniarnermi pilersaarusioneq aamma nunaminertat atorneqartarnerat pillugu inatsit inatsisilluunniit allat akerlerineqassanngitsut.

Malittarisassatiguttaaq siunnersuutigineqarpoq pilersaarusioneq aamma nunaminertat atorneqartarnerat pillugu inatsit malillugit sumiiffik pillugu kiffartuussisoqarnissaanut pilersaarutaareersut inatsimmilu matumani aalajangersakkat assignagit malittarisassiaareersut ataqqineqassasut.

Taamaaliornikkut ilaatigut kommunit sumiiffik pillugu inatsisilluunniit allat atuuttut akerleralugit sumiiffimmi aalajangersimasumi inuussutissarsiortut ingerlatsisinnaanerannut aalajangersaannginnissaq qulakkeerniarneqarpoq.

Sumiiffimmi killilersukkami takornarissanut neqeroorummik aalajangersimasumik neqeroorsinnaanermut pisinnaatitsissummik tunniussisoqartariaqartillugu nalunaarutit malittarisassartai tamanut tusarniaassutigineqartariaqarput.

Taamaaliornikkut soqutigisallit sumiiffimmi takornarissanut neqerooruteqarsinnaanermut akuersissuteqarsinnaanermut sunniuteqarsinnaasunik paasissutissaatillit paasissutissiisnaapput.

Imm. 2 -mut

Aalajangersakkami allassimavoq akuersissummut piunasaqaatini sumiiffimmi pineqartumi takornarissanut neqeroorutit allaanerit ingerlanneqarsinnaasut. Tamanna isumaqarpoq pisinnaatitsissummik piginnittoq sumiiffimmi takornarissanut neqeroorutit akuersissummi pineqartut avataatigut allaanerusunik neqerooruteqarsinnaasut. Tamannalu aamma isumaqarpoq akuersissuteqarnermi piunasaqaataanngitsunik ingerlatsisut allat sumiiffimmi takornarissanut neqeroorutinik allaanerusunik neqerooruteqarsinnaasut. Assersuutigalugu takorloorneqarsinnaavoq sumiiffimmi pineqartumi akuersissutinik marlunnik tunniussisoqarsinnaasoq, akuersissut pineqartoq ukiup qanoq ilineranut attuumassuteqarsinnaavoq, taamaalilluni pisinnaatitsissummik pigisalik sumiiffimmik piffissami pineqartumi atuinani.

§ 4-mut

Imm. 1 -imut

Naalakkersuisut takornarissanut neqerooruteqarsinnaanermut akuersissutinik nalunaaruteqarsinnaaneri siunnersuutigineqarpoq.

Taamaaliornissamut siunnersuummi § 9-mi allassimasut, tassa neqerooruteqartitsineq, malillugu ingerlatsisoqarnissaa siunnersuutigineqarpoq.

Siunnersuutigineqarportaaq takornarissanut neqeroortitsisinnaanermut akuersissutinik tunniussinissamut nalilersuinermi piunnaasaqatit siunnersuummi § 10-mi allassimasut minnerpaamillu piunnaasaqatit naammassisariaqakkat § 11-mi allassimasut aallaaviussasut.

Siunnersuutigineqarportaaq takornarissanut neqeroortitsisinnaanermi akuersissutinik tunniussineq kisermaassinertalerlugu nalunaarutigineqassasoq. Aalajangersagaq aallaavigalugu allassimavoq pisinnaatitsissummik piginnittoq imaluunniit piginnittuusut akuersissut aallaavigalugu sumiiffimmi takornarissanut neqerooruteqarsinnaatitaasut, takornarissanut neqeroorummik pineqartumik suliaqarsinnaasut. Taamaattumik pisinnaatitsissummik piginnittoq imaluunniit piginnittuusut kisiartaallutik sumiiffimmi akuersissummi pineqartumi takornarissanut neqeroorummik akiliisitsillutik kiffartuussisinnaapput.

Takornarissanut neqeroortitsisinnaanermut akuersissut malillugu sumiiffimmiissinnaanermut inatsisit allat atorunnaarsinneqanngillat. Assersuutigalugu imaassinnaavoq sumiiffimmi akiliilluni aalisartitsisinnaanermut akuersissuteqarfiusumi pisuttuortoqarsinnaasoq, soorlu aamma akuersissutit aallaavigalugit allat sumiiffimmi aalisarsinnaatitaanerit sunnerneqarnavianngitsoq.

Imm. 2-mut

Imm.1-imi allassimasut aallaavigalugit takornarissanut neqerooruteqarsinnaanermut akuersissummik nalunaaruteqarfigineqassagaanni, qinnuteqartoq siunnersuummi §§ 12-mit 15-imut allassimasut aammalu § 16-imi allassimasut naammassisinnaasariaqarpai. Tassa aalajangersakkami qinnuteqartoq akuersissummik tunineqarsinnaanermi eqqarsaatigineqassaguni, taava piunnaasaqatit atuuttut naammassisinnaasariaqarpai, taakkualu siunnersuummi § 10-mi allassimasut minnerpaamillu piunnaasaqatit naammassisariaqakkat § 11-mi allassimasut aallaaviussapput.

Piunnaasaqatit pineqartut pisinnaatitsissummik tunineqartup sillimaniarnermut pilersaarussiaanut aammalu qularnaveeqqutip annertussusaanut allatigulluunniit

sillimaniarnermut attuumassuteqarput. Ilaatigut Naalakkersuisut aalajangersaasimatillutik sulisunik pilersuisunilluunniit kalaallinik atuinissaq piumasaqaataasinnaavoq.

Takornarissanut neqerooruteqarsinnaanermut akuersissummik qinnuteqartup piumasaqaatit naammassisinnaanngippagit, qinnuteqaataa itigartitsissutigineqassaaq.

Piumasaqaatit piffissami akuersissummik nalunaaruteqarfiusumi allanngoqqusaanngillat. Akuersissummik nalunaaruteqarnermi piumasaqaatit pineqartut akuersissummik nalunaaruteqarnermut attuumassuteqarput. Pissutsit allanngussappata qulakkeerneqarsinnaanngilaq pisinnaatitsissummik piginnittup piumasaqaatit akuersissummik nalunaaruteqarnermut atatillugu inissinneqarsimasut naammassisinnaagai.

Imm. 3-mut

Takornarissanut neqerooruteqarsinnaanermut akuersissut Naalakkersuisut allakkatigut akuersitinneratigut allanut tunniunneqarsinnaanissaa siunnersuutigineqarpoq,

Pisortaqarfiit akuersissutaannik allanut tunniussisoqarniartillugu akuersissuteqarnermut atatillugu pisinnaatitaassutsimik piginnittumut pisussaaffiit ilaatigut piumasaqaatit naammassineqarnissaat qulakkeerneqartariaqarpoq, tunniussisoqartillugu pisussaaffiit ajornerulissanngillat peerneqassanatillu.

Imm. 4-mut

Atuisut paasissutissanik pissarisinnaanissaat tunngavigalugu pisinnaatitsissummik pigisallit kikkut akuersissutinik pissarsisimanersut, akuersissut sumi atorneqarsinnaanersoq akuersissutillu sivisussusaa Naalakkersuisunit tamanut saqqummiunneqarsinnaavoq. Assersuutigalugu nittartagaq tamanit takuneqarsinnaasoq atorneqarsinnaavoq. Naalakkersuisut pisinnaatitsissummik taama ittumik atussagunik, taava takornarissanut neqeroorsinnaanermut akuersissutit aallaavigalugit pisinnaatitsissummik pigisallit tamakkerlutik takuneqarsinnaalissapput, taamaaliornikkut immikkoortitsisoqarsinnaanera avaqunneqassaaq.

Imm. 5 -imut

Suleriaasissat assigiissarneqarnissaat qulakkeerniarlugu Naalakkersuisut nalunaarummik suliaqarsinnaapput tassanilu takornarissanut neqerooruteqarsinnaanermi akuersissutinik tunniussinermi atugassarititaasut sukumiinerusumik aalajangersaaffigineqarsinnaapput.

Imm. 6 -imut

Aalajangersagaq aallaavigalugu kommunini takornarissanut neqeroortitsinissamut akuersissuteqarnissamut oqartussaaffiup kommuninut ingerlatinneqarsinnaaneranut periarfissiivoq. Akuersissutinik tunniussisinnaanermut pisinnaatitsissut atorneqartussaatiillugu,

tamanna kommunalbestyrelsesemi aalajangiiffigineqassaaq, § 3-mi imm. 1-imili allassimasut malillugit Naalakkersuisut sumiiffinni nunami aalajangersimasuni takornariatitsinermut neqerooruteqarsinnaanermut akuersissuteqarfissami aalajangersaasinnaanera allanngortinneqassanngilaq.

§ 5 -imut

Imm. 1 -imut

Aalajangersakkat piffissamut akuersissutip atuuffigisagaanut tunngasuupput. Aalajangersakkap nalunaarpaa takornariatitsinermik inuussutissarsiummut akuersissut malitassatut pingaarnertut piffissamut ukiunik 20 -nik sivilissusilimmuq tunniunneqartanera. Tamanna isumaqarpoq akuersissummik tunniussisoqarnissaanut ukiunik 10-nik sivilissusilimmik tunniussisoqarsinnaasoq, immikkuullarissunillu pisoqartillugu sivilissusilimmik tunniussisoqarsinnaavoq. Immikkuullarissutut isigineqarput suliniutit angisuut. Tamatumani pisariaqassusia suliniummi ingerlatsinissamut pilersaarusiame aamma aningaasartuutissanut missingersuusiani ersersinneqarsimassaaq.

Piffissaq akuersissuteqarfiusussap inissinniarnanani, takornarissanut neqerooruteqarnissap sivilissusissaattut naatsorsuussaq kiisalu neqerooruteqarnermi aningaasatigut iluanaarutissat aallaavigalugit aalajangiisoqartassaaq.

Imm. 2 -mut

Naalakkersuisut ukiut 20-t tikillugit akuersissut sivitsorsinnaavaat. Sivitsuineq nalileereernikkut atugassarititaasunik allannguuteqartitsinani allanngortitsilluniluunniit pisinnaavoq.

Piffissaliussamik sivitsuisarnermi isiginiagassat marluupput, tassalu pisinnaatitsissummik pigisaqartup piffissamik sivitsuinissamik soqutigisai aamma illuani pisortat soqutigisaat tassa piffissamik sivitsuivallaannginnissaq, tassami ingerlaavartumik takornariatitsinermi inuussutissarsiutit niuerfiusunut naleqqussartarnissaat akornuserusunnginneqarami. Pinaveersaartinniarsarisaq tassaavoq pisinnaatitsissummik pigisaqartup piffissami naapertuutinngitsumi nunaminertami inuussutissarsiutinik ineriartortitsinani "issiaannarnissaa". Taamaattumillu pisinnaatitsissummik pigisaqartup kisermaassinerup inuussutissarsiummik ineriartortitsinermut atorineqarneranik suliffeqarfimmilu piffissami naapertuuttumi piujuartitsinermut tunngaveqarluni aningaasarsiorsinnaanermut takussutissaqartitsinissaa pingaaruteqartinneqarpoq.

Akuersissutiniq sivitsuinermit ukiut 20-t tungaannut sivitsuisoqarsinnaavoq, tamannalu pisinnaavoq ingerlatassanut pilersaarut nutaap ingerlanneqarnissaanut aammalu aningaasatigut iluanaaruteqarsinnaanissaq anguniarneqassatillugu.

Taamannak aalajangersaanermut peqqutaavoq Naalakkersuisut suliffeqarfiit suliniutiminnik misileraasarnissaannik, akuersissummilu tunngaviusunik misileraasarsinnaanissaannik Naalakkersuisut periarfisseerusunnerat. Suliffeqarfiup ilisimasat aamma misilittakkat pigilersimasai tunuliaqutaralugit nioqqutit neqeroorutaasut annertusisinnaavaat. Taamaattoq matumani isumaavoq periarfissap pineqartup atorneqartarsinnaanissaa suliffeqarfiit oqimaatsunik aningaasaliissuteqartussaattillugit. Assersuutigalugu akuersissuteqarnermut atatillugu suliffeqarfiup atortussanik akisuunik pisineratigut, imaluunniit attaveqaasersuutiniq, sanaartukkanik assigisaannillu pilersitsineratigut. Annerulersitsinermit aningaasaliissutaasut suliniutip aningaasaliiffiqineqarnissaanut qulakkeerinnissutaasinnaanissaat isiginiarneqassaaq.

Ingerlatsineq pilersaarutaareersutut ingerlatillugu takornariartitsisarnermut akuersissutiniq sivitsuiniarnermut nalilersuiniarneq piumasqaataatinik allannguinaartaqanngitsumik nalilersuiffiussaaq. Assersuutigalugu ingerlatsinissamut pilersaarummi nassiuunneqarsimasumi anguniakkat anguneqarsimasut. Sivitsuineq piumasqaataatinik allannguilluni pisinnaavoq ingerlatsinissamut pilersaarummut akuerineqaqqaartumut sanilliullugu suliniut malunnaatilimmik allannguuteqarsimappat.

Imm. 3 -mut

Akuersissutit ukiut 30-t sinnerlugit sivisussuseqartannginnissaat siunnersuutigineqarpoq.

Aalajangersagaq isumaqarpoq piffissap ukiunik 30 -nik sivisussusillip naanerani akuersissutip pigiinnarnissaa kissaatigisimatillugu akuersissummik nutaamik qinnuteqartoqartassasoq. Tamanna isumaqarpoq nutaamik neqeroortitsisoqassasoq, akuersissummillu peqaqqaartuusimasoq taamaasinerani ilimanassagunarlu periarfissamigut ingerlatsinermit suliniutip pilersereersimasat akuersissuteqartoqqaarneraniit tunngavigalugit inissisimalluarnerussasoq.

§ 6-mut

Imm. 1 -imut

Aalajangersakkap qinnuteqartoq paasissutissiinissamut pisussaaffilerpaa.

Paasissutissiisusaanermit isumagineqarpoq siullertut pisut qinnuteqartup namminerisamik erseqqissaasusaanera pissutsinut akuersissummut tunngassuteqartunut, pisortat qinnuteqaammik suliaqarnerannut attuumassuteqarsinnaasunik. Tamatumani assersuutigalugu pineqarsinnaapput nioqqutigisanik tunisaqartarnermit naatsorsuutigeriinngisanik

pisarsimasinnaasut. Pissutsit taamaattut assersuutigalugu pisariaqartitsilersinnaapput Naalakkersuisut isumaliuteqartariaqarnerannut sillimaniarnermi atugassarititaasunik naleqqussaasariaqarnermik, nioqqutinut assingusunut atatillugu.

Aappaattut Naalakkersuisunut noqqaassuteqarneratigut pineqartoq paasissutissiisussaataavoq. Tamatumani assersuutigalugu pineqarsimasinnaapput nioqqutinik qassinik tunisaqarsimaneq imaluunniit tiguneqarsinnaasut pillugit apeqqutit.

Imm. 2 -mut

Aalajangersagaq aallaavigalugu paasissutissiisusnaanermi annertussutsinut paasissutissallu qanoq tunniunneqarsinnaanerinit tunngasunik Naalakkersuisut aalajangersaasinnaapput. Assersuutigalugu Naalakkersuisut immersugassaq aalajangersimasoq malillugu paasissutisseeqqusisinnaapput. Imaluunniit nalunaarutit digitalimik portali aalajangersimasoq atoqquneqarsinnaalluni.

§ 7 -imut

Imm. 1-mut

Aalajangersakkami aalajangiunneqarpoq Naalakkersuisut pilersitsisinnaanermik ingerlatsisinnaanermillu ataatsimiititaliamik nalilersuisartussamik kommunimi pineqartumi akuersissuteqarfiusartunut atatillugu aalajangiisinnaanerat. Aalajangersagaq oqaasertaligaavoq piomagunik aatsaat aalajangersaasinnaasut, tassungalu pissutaavoq kommunimi pineqartumi qinnuteqaammik suliassaartoqalerpat aatsaat takornariartitsisarnernut akuersissuteqarnissamut nalilersuisartunik pilersitsinissaq pisariaqalissammat.

Siusinnerusumut sanilliullugu takornariartitsinermi akuersissutinik qinnuteqaatinik suliaqarnermi akuersissutinillu nalunaaruteqartarnermi najukkani oqartussaasunik peqataatitsinerunissaq anguniarlugu taamatut aalajangersaasoqarsimavoq.

Takornariartitsinermut neqerooruteqarsinnaanermut akuersissutinik tunniussisoqartussaataillugu pisortaarfik aalajangiisinnaatitaasoq naliliinissamut ataatsimiititaliamik pilersitsileruni siunnersuummi allassimasut malillugit ataatsimiititaliamik pituttugaanngitsumik pilersitsissaaq. Tassunga atatillugu aalajangiinissamut ataatsimiititaliaq, avataaniittunut avitsisoqarsimangippat, pisortat ingerlatsineranni suliassat suliarineqartarnerat malillugu aammalu pisortat ingerlatsinerat pillugu paasitinneqarsinnaatitaaneq malillugu inassuteqaasiussaaq.

Imm. 2-mut

Sumiiffimmut akuersissuteqarfiusussamut qinnuteqaatit taakkunungalu attuumassutillit allat akuersissutillu tunniunneqarsimasut aallaavigalugit nalilersuinnermut ataatsimiititaliaq innersuussuteqartarnissaa siunnersuutaavoq. Tamannalu Naalakkersuisut noqqaassuteqarneratigut pisassaaq.

Nalilersuisarnermut ataatsimiititaliaq nalilersuinnermik aallaavigalugu tunngavilersukkanik inassuseqaasiussapput. Isumaqatigiittoqarsinnaanngippat aalajangiineq taasinikkut pissaaq. Amerlanerussuteqartut aallaavigalugit nalilersuisarnermut ataatsimiititaliaq inassuteqaasiussaaq.

Nalilersuisarnermut ataatsimiititaliami ilaasortassatut toqqakkat affai peqataatillugit aalajangiisoqarsinnaavoq. Taamaakkaluartoq minnerpaamik Namminersorlutik Oqartussa qarfiup kommunillu aallartitaat ataatsimiinnermi peqataassapput. Taamaaliordermi sumiiffimmit peqataatitsinissaa kiisalu sinaakkutit tunngaviusut malinneqarnissaat qulakkeerniarneqarpoq.

Takornariaqarnermut neqerooruteqarsinnaanermut akuersissummi pissutsit assigiinngitsut aallaavigalugit nalilersuinissamut ataatsimiititaliap inassuteqaasiornissaa naatsorsuussaavoq.

Siullertut sumiiffimmi akuersissuteqarfiusussami neqeroortitsitsisoqarneratigut qinnuteqaatit nassiunneqartut nalilersuisarnermut ataatsimiititaliap suleqataaffigissagai siunnersuutigineqarpoq.

Aappaattut nalilersuisarnermut ataatsimiititaliap siunnersuummi § 17-imi allassimasut aallaavigalugit akuersissummik nalunaaruteqarsinnaanernut pisinnaatitsissummik pigisallip ingerlatsinissaminut pilersaarussiaa qanoq naapertuutsiginersoq kiisalu ingerlatsinissamut pilersaarummi suut naapertuunnersut nalilersuiffigissavaat.

Pingajuattut akuersissummut piunnaasaqataassut pillugit naammassinnissinnaannginneq aallaavigalugu siunnersuummi § 25 imm. 1-imi allassimasut malillugit peqqussuteqartoqarsinnaanernut tunngatillugu nalilersuisarnermut ataatsimiititaliaq nalilersuisinneqarsinnaavoq. Assersuutigalugu imaassinnaavoq nalilersuisarnermut ataatsimiititaliaq isumaqartoq akuersissuteqarnerup atorunnaarsinneqarnerani illuutit sanaartukkalluunniit allat peerneqarnissaannut peqqussuteqartoqarsinnaasoq. Pisinnaatitsissummik piginnittoq unioqqutitsineratigut aamma aaqqiissuteqartoqarnissaanik peqqussusiortoqarsinnaavoq.

Pingajuattut takornarissanut neqerooruteqarsinnaanermut akuersissut ingerlatsisumut allamut tunniunneqarniartillugu nalilersuisarnermut ataatsimiititaliaq suliniutip tiginissaanut piunnaasaqatinik naammassinninnersoq nalilersuisinneqarsinnaavoq.

Pingajuattut akuersissutaasup sivitsorneqarnissaanut qinnuteqarnermi nalilersuisarnermut ataatsimiititaliaq nalilersuisinneqarsinnaavoq.

Qulaani taakkartorneqartut taakkuinnaanngillat, allatigut Naalakkersuisut nalilersuisarnermut ataatsimiititaliamut nalilersortikkusutaa aamma nalilersuiffigineqarsinnaavoq.

Imm. 3-mut

Naalakkersuisut nalilersuisarnermut ataatsimiititaliamut ilaasortassanik siulittaasussamillu toqqaasinnaanermut kiisalu taasisarnermut malittarisassanik aalajangersaasinnaapput.

Aalajangersagaq aallaavigalugu siullertut Naalakkersuisut nalilersuisarnermut ataatsimiititaliamut ilaasortassanik toqqaasarnermut suleriesissanik aalajangersaasinnaapput, tassunga ilanngullugu ilaasortat amerlassusissaat ilaasortallu agguataarneqarnerat.

Aalajangersagaq aallaavigalugu aappaattut Naalakkersuisut siulittaasussamik toqqaasarnermut suleriesissanik aalajangersaasinnaapput, tassunga ilanngullugu piginnaasassatut assigisaattullu piumasaqaatit.

Aalajangersagaq aallaavigalugu pingajuattut Naalakkersuisut nalilersuisarnermut ataatsimiititaliami taasisarnermut suleriaasissanik aalajangersaasinnaapput, soorlu assersuutigalugu toqqaasinnaassusillit aallaavigalugit inernerit.

§ 8-mut

Inatsisartut inatsisaanni § 3-mi, §§ 12-15-mut aammalu §§ 17-18-imilu aalajangersakkat aammalu inatsisartut inatsisaanni matumani aalajangersakkanut allanut immikkuullarissumik pisoqartillugu piumasaqaatinut Naalakkersuisut immikkut akuersissuteqarsinnaanerit periarfissaavoq.

Immikkut akuersissuteqarsinnaaneq siunnersuutigineqarpoq pisinnaatitsissummik piginnittup ilaatigut allaffissornikkut aningaasatigullu inissisimaffia mianeriniarlugu. Naalakkersuisut pisuni ataasiakkaani immikkut akuersissuteqartoqartariaqarnerisooq nalilersuisassapput.

Siunnersuut aallaavigalugu Naalakkersuisut sillimaniarnermut pilersaaruteqarnissamut piumasaqaammut immikkut akuersissuteqarsinnaapput, taamaaliorinnaappullu akuersissut aallaavigalugu takornarissanut neqeroorutaasussap navianaataa Naalakkersuisunit nalilersorneqarsimappat.

Tamannalu aamma pisinnaavoq pisinnaatitsissummik piginnittoq immikkut mianeriniartillugu, assersuutigalugu pisinnaatitsissummik piginnittup sulisui ikippata,

ilinniarnini napparsimaniniluunniit peqqutigalugu nunani allaniittariaqartarpat imaluunniit pisinnaatitsissummik piginnittup piumasaqaatinik attassiniarnermini naapertuutinnngitsumik allaffissornikkut suliaqassaguni aningaasartuuteqassagunilu. Taakkartukkat kisimik aallaaviussanngillat.

Siunnersuummittaag § 3-mi sumiiffimmi killilimmi akuersissut aallaavigalugu takornarissanut neqerooruteqarsinnaanermut piumasaqataasunut immikkut akuersissuteqartoqarsinnaavoq. Sumiiffimmi killilikkami takornarissanut kiffartuussisinnaanermut Tunngaviusumik inatsimmi § 73-imi allassimasut malillugit arsaarinninnissamut tunngatillugu piumasaateqartoqarsinnaatillugu pineqartup immikkut akuersissummik tunineqarsinnaanissaa siunertaavoq.

Takornarissanut neqerooruteqarsinnaanermut akuersissut tunngavigalugu pisinnaatitsissummik piginnittup piffissap ingerlanerani atugassarititaasutigut allannguuteqartoqarneratigut, takornarissanut neqerooruteqarsinnaanermut akuersissummi piumasaqaatinik naammassinnissinnaajunnaarnerminut atatillugu immikkut akuerineqarnissaminut qinnuteqarsinnaavoq.

§ 9-mut

Imm. 1-mut

Siunnersuut malillugu takornarialerisunut akuerissummik tunniussisoqarsinnaavoq neqeroortitsisoqareerneratigut aammalu nalilersuineranut ataatsimiititaliamut naapertuuttumut tusarniaasoqareernerata kingorna takuuk siunnersuummi § 7.

Aalajangersagaq aallaavigalugu takornariartitsisarnermut akuersissuteqartoqarnissaanik siunertaqartumik nalinginnaasumik tamanut ammasumik qinnuteqaqqusisoqassaaq, taannalu neqeroortitsineramik taaneqartarpoq. Tamatumunnga tunuliaqutaavoq sumiiffimmi takornarialeriffiusinnaasumik pilerinartumut suliffeqarfiit arlallit ingerlatserusussuseqarsinnaaneri. Tamanut ammasumik nalinginnaasumik qinnuteqaqqusisarnerni Naalakkersuisut tamanut nalunaaruteqartarput qinnuteqaqqusillutik taannalu minnerpaamik ulluinnarnik 45 sivisussuseqassaaq. Tamanut saqqummiisoqartarpoq Naalakkersuisut quppersagaanni tusagassiorfitsigullu.

Imm.2-mut

Aalajangersagaq aallaavigalugu Naalakkersuisut periarfissaqarput siusinnerusukkt neqeroortitsiffioreersup iluani nutaamik neqeroortitseqqeqqaanngikkaluarlutik sumiiffimmut akuersissuteqarnissamut, tamannalu pisinnaavoq qinnuteqaat kingusinnerpaamik neqeroortitsinerup naaneraniit qaammatit 18-it tikitsinnagu tigusimagaanni. Aalajangersakkap

siunnersuummi matuma tunuliaqutaraa sumiiffinnik akuersissuteqarfiusinnaasunik peqartarnera qinnuteqarfigineqanngitsunik. Pisuni ataasiakkaani qinnuteqarfissap qaangiunneranit qinnuteqaatinik nassiussisoqarsinnaasarpog. Innersuussilluni sumiiffimmut qinnuteqartoqarsimanginneranik naatsorsuutigineqarpoq allanik sumiiffimmut qinnuteqartoqarnianginnera, taamaammallu nutaamik qinnuteqartitsineq kinguneqassanngitsoq piukkunnartumik akuersissuteqarnissamut.

Imm. 3-mut

Aalajangersakkami aallaavigalugu neqeroortitsisoqareerneratigut Naalakkersuisut akuersissummik tunniussisariaqavinninnerat aalajangersarneqarpoq. Taamaasillutik Naalakkersuisut suleriaaseq imm. 1-imi taakkartorneqartoq aallaavigalugu qinnuteqartoqaraluartoq akuersissuteqanngitsuinnarsinnaatitaapput, tamannalu pisinnaavoq neqeroortitsinermi piumasaqaatit qinnuteqartut akornanni naammassineqarsinnaanngippata.

Tamatuma kingorna Naalakkersuisut imm. 1-imi allassimasut aallaavigalugit nutaamik akuersissutinut qinnuteqaqqusummik ingerlatitseqqissinnaapput, imaluunniit sumiiffik piumasaqaatitalimmik akuersissuteqarfiusarunnaassanersoq aalajangiiffigineqassalluni.

§ 10-mut

Imm. 1 -imut

Aalajangersakkami nalunaarsorneqarput toqqaasarnermi piumasaqaatit akuersissuteqarnermi tunngavigineqassasut. Piumasaqaatit taamaasillutik inatsisunik tunngavilimmik kinaassusersiunngitsumillu piumasaqaataapput qinnuteqartut sumiiffimmut ataatsimut arlaqartut nalilersuivigineqarnissaannut. Toqqaasarnermi piumasaqaatit qinnuteqartitseeernermi qinnuteqaatinik nalilersuisoqalinnginnerani qanoq oqimaalutarneqarnissai aalajangerneqassaaq. Toqqaasarnermi atugassarititaasut tullerriaarneri atuuttut taamaasilluni oqimaalutaanermik tunngaveqanngilaq.

Nr. 1 -imut

Aalajangersakkami pineqarput qinnuteqartunik toqqaasarnermi piumasaqaatit teknikkikkut pisinnaasat. Qinnuteqartup siusinnerusukkut neqeroornermi, nioqquteqarnermi, tunisaqartarnermi piviusunngortitsisarnermilu ingerlatereersimanagera toqqaarnermi oqimaannerusinnaapput. Takornarialerisoq neqeroorutaasup assinganik ingerlatsinikuunngikkuni, taava takornarissanut neqeroorutaasussanut assingusunik ingerlatsisimaneq aamma oqimaaqutaasinnaavoq. Pisinnaatitsissummik pigisaqartoq takornariassanut neqeroortitsinissamut naleqquttunik piginnaaneqartariaqarpoq. Tamannalu suliffeqarfiup isumannaatsumik akilersinnaasumillu ingerlanneqarnissaanut piumasaqaataavoq.

Nr. 2 -mut

Aalajangersakkami qinnuteqartup aningaasaqarnikkut aningaasalersuisinnaanikkullu qanoq ittunik periarfissaqarneranik piginnaanerinillu, tassunga ilanngullugu aningaasaqarnikkut sinaakkutigisaanik imaqarpoq. Qinnuteqartup aningaasaqarnikkut qanoq ittunik tunuliaqutaqarnera toqqaanissami oqimaassuseqassaaq. Akuersissummik nalunaaruteqarsinnaanermi qinnuteqartup aningaasatigut inissisimanera pingaaruteqarpoq, tassami qinnuteqartup takornarissanut neqerooruteqarnissaminut sullissinissaminullu atatillugu aningaasartuutaasussanut naapertuuttumik matussusiisinaanera isiginiagassaavoq. Aningaasaqarnikkut sinaakkutit qinnuteqartup suliniummik piviusunngortitsisinaaneranut sunniuteqarput.

Nr. 3-mut

Siunnersuummi qinnuteqartup iliuusissaminut pilersaarusiaani missingiutaasumi takornarissanut neqeroorutitik tunniussinissaminut qanoq iliuuseqarniarnersoq aalajangersarneqarsimavoq. Takornariartitsisarnermut akuersissummik akuerineqarsinnaajumalluni qinnuteqartoq nioqqutiminik naammaginatsumik ussassaarisinnaassaguni aningaasatigut nukissaqartariaqarpoq, taamaaliornikkut pisisinnaasunik soqutiginnilersitsisinnaalluni, tamannalu pisinnaatitsissummik pigisalimmut inuiaqatigiinnullu aningaasaqarnikkut ineriartuutaasinnaassaaq. Qinnuteqartup nioqqutissaminik ussassaarisinnaanera aammalu tuniniaaffiusinnaasunik pilersitsisinaanera toqqaanissami oqimaassuseqassaaq.

Oqimaalutaanermi oqimaassuseqartut aammattaq ilagaat qinnuteqartup suliffissanik pilersitsiniarluni siunnersuutai najukkanilu nioqquteqartartunik atuiniarnera. Takornarissanut neqeroortitsisinaanernut akuersissummik nalilersuiniarnermi qinnuteqartup § 2-mi imm. 6-imi kalaallinik sulisunik aammalu § 2-mi imm. 7-mi kalaallinik pilersuisunik atuiniarnera aamma oqimaalutaatigineqassapput.

Nr. 4-mut

Siunnersuummi qinnuteqartup sumiiffimmi ingerlatsinera imaluunniit ingerlatsinissaminut pilersaarutai eqqarsaatigissagaanni, neqeroortitsisoqarneranut atatillugu qinnuteqartoq sumiiffimmi ingerlatsilereersimaguni, taava tamanna aamma oqimaalutaatigineqassaaq.

Imm 3-mi allassimasut aallaavigalugit toqqaanissamut piumasagaatit oqimaatigiiissaarneqassapput, oqimaalutaariaaserlu qinnuteqaqqusissummi tamanut saqqummiunneqassaaq. Uani ersarissarneqarpoq qinnuteqartoq sumiiffimmi akuersissuteqarfiusussami ingerlatsisooreersoq ajunnginnerusumik inissisimassasoq, tamannali peqqutaalluni automatiskimik akuersissummik tunineqarsinnaanani. Sumiiffimmi ingerlatsisinaanernut akuersissutaasussami ingerlatsinerit pineqartut tamakkiisumik ilaannakortumilluunniit ussassaarutaasimasinnaapput, tuniniarneqarsimasinnaapput tunniunneqarsimasinnaallutillu.

Takornarialerinissamut akuersissummik nalunaaruteqarnissamut atatillugu ingerlatsinissamut pilersaarut akuersissummut atugassarititaasunut ilanngunneqassaaq, taamaalilluni pisinnaatitsissummik pigisaqartup pilersaarummik malinninnissani pisussaaffigilissavaa.

Nr. 5 -imut

Siunnersuummi qinnuteqartup takornarissanut neqerooruteqarnissaminut ingerlatsinissaminullu piujuaannartitsinermik tunngaveqartumik ingerlatsinnaanissaanut piginnaasai pisinnaassusaalu siammasissummik paasineqassaaq. Piujuaannartitsineq pinngortitamut, avatangiisunut, silaannarmut, sulinermik inuussutissarsiuteqartunut atugassarititaasunut aammalu inuiaqatigiinni nalinginnaasunik soqutigisanut tunngasinnaavoq. Tamatumani assersuutigalugu pineqarsinnaapput qinnuteqartup qanoq aaqqissuussisarnikkut eqqagassanik ikinnerpaaffissamiititsinera, avatangiisunut inussiarnersumik aaqqiissutissarsisarnera, atueqqittarnerup periaatsiniitsinera, pigisanik atuisarnerup aaqqissuullugaanera, qanoq pinngortitamut malunniuttartut annikitsuutinneqarneri suliffeqarfimmik pilersitsinermi aamma inuiaqatigiinni innuttaasut ilaat suliffeqarnerup avataaniittut akulerunneqartarsinnaaneri. Matumani aamma pineqarsinnaapput suliffeqarfiit sulisorisaminnik periarfissaqartitsisut sulisarnissamik atugaqarnissamillu isumatuumik aaqqissuussinernik imaqartunik, ilutigisaanillu peqqissutsimik tarnikkut allatigullu pitsaasumik atugaqarfiusumik. Tassaasinnaapput suliffeqarfiit ilinniartitaanerni unammilligassanik kalaallit suliffeqarneranniittunik isiginiaasartut, ilinniartitaanernik piginnaasatigullu ineriartortitsinermik sulinerup ilaatut ingerlatsisut ineriartortitsiviusunik sulisorisat akornanni suliffeqarfiup ingerlanneqarani ineriartortitsinermilu.

Imm. 2 -mut

Siunnersuummi akuersissummik tunniussinissami tunngavissaqarnerujumalluni qinnuteqartut arlaqartut akornanni naligiittoqarnerani Naalakkersuisut atugassarititaasunik arlaqarnerusunik aalajangersaanissamut periarfissaat pineqarpoq. Aalajangersakkanut piumasaqaatit ilassutaasinnaasut naleqquttuusariaqarput, kinaassusersiortuunatik immikkoortitsinatillu. Ilassutininik piumasaqaasiorsinnaaneq aatsaat atorneqalissaaq toqqaasarnermi piumasaqaatit imm. 1 -imiittut aallaavigalugit nalilersuisoqareernerani, tassanilu qinnuteqartunik naliliinermi naligiittoqarnerani. Tassa imaappoq nalilersuinermi imm. 2-mi eqqaaneqartut toqqaasarnermi piumasaqaataasut Naalakkersuisut aalajangersarsinnaasaat siulliullugit atorneqartussaasut, periarfissaqaranilu taakkua tunngavigalugit marluk arlaqartulluunniit akornanni toqqaasoqarsinnaaneranut akuersissuteqarnissamut.

Imm. 3 -mut

Uani ilisimatitsissutigineqarpoq toqqaanissamut piumasaqaatit qanoq oqimaalutarneqarneri neqeroortitsinermi pineqartumi ilisimatitsissutigineqartassasut. Saqqummiinerlu

qinnuteqaqqusissutip tamanut nalunaarutigineqarneranut atatillugu pisassaaq. Toqqaasarnermi piunasaqaataasuni aalajangersakkat akornanni oqimaalutaasarnerni immikkoortitsisoqarsinnaavoq salliutitassatut tulliutitassatullu.

§ 11 -imut

Imm. 1 -imut

Siunnersuummi Naalackersuisut neqeroortitsinermit atatillugu piunasaqaatit minnerpaaffissaanik aaqquissuussisinnaasut aalajangersarneqarpoq. Piunasaqaatit minnerpaaffissaat paasineqassaaq piunasaqaatit aalajangersakkat tunngaviusut sanioqqunneqarsinnaanngitsut. Qinnuteqartut piunasaqaatinik minnerpaaffissanik naammassisaqanngitsut toqqarneqarsinnaanngillat, aamma naak atugassarititaasuni allani naammaginatunik tunngavilersuigaluarlutik. Piunasaqaatit minnerpaaffissaat aalajangersarneqarsinnaapput qinnuteqartup pinngitsoorani naammassisassaattut pissutsini aalajangersimasuni, imaluunniit piunasaqaatit qinnuteqartup toqqaasarnermi atugassarititaasunik nalilersuinermit angusaqarfiginerusimasassaattut, pointinik aalajangersimasunik pissarsiffigisassatut imaluunniit naliliinermit qaangigassaattut.

Aalajangersagarlu assersuutigalugu atorneqarsinnaavoq Naalackersuisut akuersissummik tunniussisoqarnissani neqeroortitsinermit atatillugu sumiiffimmi pinngortitamik illersuinerup immikkut pingaaruteqarfisaani minnerpaaffissanik aalajangersaanerani, taamaaliortoqassarlu pissutsit pineqartut immikkut isiginiarsinnaajumallugit.

Minnerpaaffissanik aalajangersaaneq aamma atorneqarsinnaavoq suliffeqarfiit mikisut sumiiffiup nalaaniittut periarfissinniarlugit. Assersuutigalugu sumiiffiup nalaani suliffeqarfiit anginerit ingerlalluareersullu tassaniippata, sumiiffimmili pineqartumi suliffeqarfiit pingaarnertut ingerlataqaratik. Piunasaqaatinik minnerpaaffissaqartitsineq taamaasilluni atorneqarsinnaavoq najukkami ineriartortitsiniarnerup anguniarneqarnerani.

§ 12-mut

Imm. 1-mut

Siunnersuummi inuk pisinnaatitsissummik piginnittuusinnaaneranut piunasaqatimik imaqarpoq.

Siullertut inuk pineqartoq Kalaallit Nunaanni najugaqartutut nalunaarsorsimassaaq, minnerpaamillu ukiuni 5-ni kingullerni najugaqartutut nalunaarsorneqarsimasussaalluni.

Aappaattut pineqartoq Kalaallit Nunaannut tamakkiisumik akileraartussaataitanerannik piunasaqaateqartoqarpoq.

Sisamaattut pineqartoq tamakkiisumik pigisaminik atuisinnaassaaq, akiliisinnaajunnaartutut, akiliisinnaanngitsutut imaluunniit sulianik unitsitsisutut inissisimaqqusaanngilaq.

Tallimaattut piumasaqataavoq pineqartoq Naalakkersuisunut 100.000 kr.-init annertunerusunik akiitsoqassanngitsoq akilerneqanngitsunik. Inatsit pineqartoq neqeroortitsinermut inatsimmit aallaaveqarpoq. Pineqartoq akilersuinissaminut isumaqatigiissusiorsimaguni, taava piumasaqaat manna naammassineqartutut isigineqartarpoq.

Naalakkersuisut qinnuteqartumut piumasaqaatit tallimat pineqartut pillugit uppernarsaatiniq piumasaqarsinnaatitaapput. Piumasaqaatit ingerlatsinermut periutsit nalinginnaasut malillugit najugaqarnermut nalunaarsukkat akileraartarnermullu aqutsisoqarfimmi nalunaarsukkat aallaavigalugit misissorneqarsinnaapput. Taamaaliornissamut inuit paasissutissaataat pillugit inatsimmi allassimasut malinneqassapput.

Piumasaqaatit pillugit immikkut pisoqartillugu siunnersuummi § 8-mi allassimasut aallaavigalugit Naalakkersuisut immikkut akuersissuteqarsinnaapput.

§ 13-mut

Imm. 1-mut

Siunnersuummi inatsisitigut inuk pisinnaatitsissummik piginnittuusinnaaneranut piumasaqatimik imaqarpoq.

Siullertut inatsisitigut inuk pineqartoq Kalaallit Nunaanni ingerlatsivittut aningaasaliiffiusutut imaluunniit suliffeqartittut nalunaarsorneqarsimassaaq.

Aappaattut suliffeqarfik pineqartoq akiliisinnaajunnaartutut, akiliisinnaanngitsutut imaluunniit sulianik unitsitsisutut inissisimaqqusaanngilaq.

Pingajuattut ingerlatseqatigiiffiup nammineq aningaasaataasa affai sinnerlugit toqqaannartumik toqqaannanngitsumilluunniit inuit piginnittuusut § 12-imi allassimasunik naammassinnissasut kiisalu taasisinnaasut affai sinnerlugit toqqaannartumik toqqaannanngitsumilluunniit § 12-imi nr.1-mit 4-mut allassimasunik aamma naammassinnissinnaassasut. Toqqaannanngitsumik piginnittuusut imaluunniit taasisinnaasut § 12-imi nr.1-mit 4-mut allassimasunik naammassinnissinnaassasut pineqartillugit, inuk takornariartitsisartumut suliffeqarfik piginneqatigiiffiusoq assersuutigalugu holding aqutugalugu piginnittuovoq imaluunniit takornariartitsisartumut taasisinnaatitaavoq.

Suliffeqarfinnik pilersitsisoqarnissaa pinaveersaartinniarlugu § 12-imi piunasaqaatit ikkunneqarsimapput. Ilaatigut avataaniit aningaasaliisoqarnissaa pisariaqartinneqarsinnaasarpog. Aalajangersagarlu ikkunneqarsimavoq pilersitsisoqarsinnaanissaa aningaasaliisoqarsinnaanissaalu oqimaaqatigiisinniarsariniarlugit.

Sisamaattut piunasaqaataavoq suliffeqarfimmi peqataasut affai sinnerlugit § 12-imi nr. 1-mit 4-mut allassimasunik naammassinnissinnaassasut.

Peqataasussanut piunasaqaataasoq imm. 1-imi nr. 3-mi mianerinninneq Imm. 1-imi nr. 4-mut aamma atuuppoq.

Tallimaattut piunasaqaataavoq suliffeqarfik Naalakkersuisunut 100.000 kr.-init annertunerusunik akiitsoqassanngitsoq akilerneqanngitsunik. Inatsit pineqartoq neqeroortitsinermut inatsimmit aallaaveqarpoq. Suliffeqarfik akilersuinissaminut isumaqatigiissusiorsimaguni, taava piunasaqaat manna naammassineqartutut isigineqartarpoq.

Naalakkersuisut qinnuteqartumut piunasaqaatit tallimat pineqartut pillugit uppersaatinik piunasaqarsinnaatitaapput. Piunasaqaatit ingerlatsinermut periutsit nalinginnaasut malillugit najugaqarnermut nalunaarsukkat akileraartarnermullu aqutsisoqarfimmi nalunaarsukkat aallaavigalugit misissorneqarsinnaapput. Taamaaliornissamut inuit paasissutissaataat pillugit inatsimmi allassimasut malinneqassapput.

Piunasaqaatit pillugit immikkut pisoqartillugu siunnersuummi § 8-mi allassimasut aallaavigalugit Naalakkersuisut immikkut akuersissuteqarsinnaapput.

14 -imut

Imm. 1 -imut

Imm. 1 -imi siunnersuutigineqarpoq takornariartitsisarnermut akuersissummik nalunaaruteqartoqarsinnaaneranut piunasaqaatit aallaaviusassasoq qinnuteqartup sillimaniarnermut pilersaarusiamik allaganngukkamik suliaqarsimasarnissaa, tassanilu ingerlatsinerni qinnutigineqartuni aalajangersimasuni neqeroorutigineqartussani iliuusissat suunissaannik allassimasoqassaaq. Sillimaniarnermut pilersaarusiaq akuersissummut qinnuteqaammut ilanngunneqassaaq.

Imm. 2-mut

Ingerlatassanut kissaatigineqartunut tamanut sillimanermut pilersaarusiortoqarsimanissaa siunnersuutigineqarpoq.

Tamatuma assersuutigalugu kinguneraa nannunik takusassarsiortitsisarnermut akuersissummi sillimaniarnermut pilersaaruteqartussaana, tassanilu ilaatigut ingerlattakkap ulorianaateqarsinnaanera allaaserineqassaaq.

Ingerlatsinissat takornariatitsisartup suleqatigisamik avataaneersunut sulisitsineratigut ingerlanneqartartut aamma sillimaniarnermut pilersaarusiunneqassapput.

Imm. 3 -mut

Sillimaniarnermut pilersaarusiaq sukkulluunniit akuersissummik nalunaaruteqarfigineqartumi allaganngorlugu kalaallisut aamma tuluttut takornarissanut tigoriaannanngorlugu inissinneqassaaq. Tamanna assersuutigalugu takornariatitsisartup nittartagaaniissinnaavoq.

Imm. 4 -mut

Siunnersuummi allassimasut malillugit sillimaniarnermut pilersaarusiaq nalorninaatinik nalilersuineramik aamma sillimaniarnermi iliuuserineqartussanik atuuttunik imaqassaaq, takuuk imm. 5-6 -imut nassuiaatitit oqaaseqaatit.

Kinaluunniit Kalaallit Nunaanni susassa qarfinni ingerlatsinissanik neqerooruteqartoq sillimaniarnermut pilersaarusiamik pisariaqartitsisoqartillugu nutarterisarnissamut akisussaavoq. Takornariatitsisartup nammineq sillimaniarnermut pilersaarummik nutarterisoqarnissaanut nalilersuisussaavoq, kisiannili siunnersuummi § 25-mi allassimasut malillugit Naalakkersuisut nakkutiginnittussaapput aalajangiisinnaallutillu. Assersuutigalugu sillimaniarnermut pilersaarummi nutarterisoqartariaqalersinnaavoq ingerlatsinerup allannguuteqarneratigut ulorianaataasinnaasut nutaat pilerpata, imaluunniit sumiiffimmi aalajangersimasumik pisoqarsimanera aallaavigalugu ingerlatsinermi mianersugassat nutaanngorsimappata.

Imm. 5 -mut

Sillimaniarnermut pilersaarusiame ilaassaaq nalorninaatinik nalilersuineq, taannalu peqataasunut tulluarsagaassaaq, tassanilu ingerlatani aalajangersimasuni peqataanermut atatillugu navianaataasinnaasunik nalilersuineramik imaqassaaq. Assersuutigalugu nannunik sumiiffimmut takusassarsiortoqarnissanik kissaateqarnermi, pilertortumik takornariarnissami navianaataasinnaasut pillugit nalilersuineramik takunnissinnaaneq.

Nalorninaatinik nalilersuineq ingerlatsisoqannginnerani takornariatitsinissami peqataasussanut ingerlatassami pineqartumi tunniunneqassaaq, allataassallunilu ersarissumik oqaatsillu paasiuminartut atorlugit. Nalorninaatinik nalilersuineq ingerlatassami pineqartumi pissutsinut naleqquttuussaaq peqataasunullu ersarissumik paasissutissiissutissatut atorneqassalluni.

Ingerlanneqartussamik piareersaasiormi nalorninaatinik nalilersuineq atorneqassaaq sulisuusussanik toqqaanermi, tamatumani aamma angalasut pisortassaannik, piffissami angalaffiusussami, avatangiisini pissutsinik nalilersuineri, atortussanik / sakkussanik toqqartuineri il.il. Tamatuma assersuutigalugu kingunerissavaa atortussat / sakkussat pisariaqartinneqarsinnaasut ingerlatsinissami pineqartumi naleqquttuunissaat.

Imm. 6 -imut

Sillimaniarnermut pilersaarusiarmut upalungaarsimanermut pilersaarusiaq ilanngunneqassaaq, tassanilu navianartunik nalaataqarnermi ajutoortoqarneraniluunniit qanoq suleriuseqartoqassanersoq nassuiarneqarsimassalluni.. Sillimaniarnermut pilersaarummi sulisut ingerlatami peqataasut ilisimasassaannut, misilittagarisassaannut aammalu piginnaanerisassaattut piunasaqaatit allassimassapput, navianartoqartillugulu qanoq attaveqariaaseqassanersut ilanngunneqassalluni. Tassanilu suliffillit pinartoqartillugu qanoq iliuseqassanersut ersarissumik nassuiarneqarsimassaaq.

Imm. 7-mut

Siunnersuummi aalajangersarneqarsimavoq imm. 1-mit 6-mut allassimasut atorneqassanngitsut, qinnuteqartup sumiiffimmi inatsit alla imaluunniit periuseq alla ingerlatsineq pillugu sillimaniarnermut piunasaqaatitaqareersoq atuutsissallugit pisussaaffilerneqarsimappat.

Uanilu ilaatigut pineqarsinnaavoq Kalaallit Nunaanni umiarsuit isumannaatsumik angalasinnaanissaannut assigisaannullu nalunaarut nr. 1697 11. december 2015-meersoq.

Taakkua saniatigut immikkut pisoqartillugu Naalakkersuisut siunnersuummi § 8-mi allassimasut pillugit immikkut akuersissuteqarsinnaapput.

§ 15-mut

Imm. 1 -mut

Siunnersuutaasumi inatsisartut inatsisaat una atorlugu takornarissanut neqeroorutaasartuni akisussaatinneqarnissamut sillimaserneqartarnissaat allatigulluunniit sillimaniarnikkut qularnaveeqqusiisoqartarsimanissaq aalajangersarneqarsimavoq.

Aalajangersagaq naatsorsuutigineqarpoq atorneqartussatut ingerlatsinerit ajoqusertoqarsinnaaneranut ulorianaateqartutut nalilerneqartillugit.

Akisussaatinneqarnissamut sillimmaserneqartarnissamut allatigut aaqqiissutaasinnaasoq tassaasinnaavoq konto toqporteriviusoq aningaasanik imalik imaluunniit danmarkimi naalagaaffiup obligatiunianik pigisaqarneq imaluunniit aningaaseriit qularnaveeqqusiinerat.

Taakkua saniatigut immikkut pisoqartillugu Naalackersuisut siunnersuummi § 8-mi allassimasut pillugit immikkut akuersissuteqarsinnaapput.

Imm. 2 -mut

Siunnersuummi inuussutissarsiortut sillimmasersimanissaannut allatigulluunniit isumannaallisaanermut sillimmaserneqarsimanissaannut piunasaqaat imm. 1-imiittoq pineqarsinnaanngippat, piunasaqaatigineqartariaqannginnera aalajangersarneqarsimavoq. Taamatut pisoqarsinnaavoq sillimmasiisarfiit takornarissanik sullissisup takornarissanut neqeroorutiginiagaannut sillimmasiisinnaanngippata. Assersuutigalugu qimussiussinermi massakkumut inuussutissarsiutillit akisussaatinneqarnissaminnut sillimmasernissaannut sillimmasiisarfiit neqerooruteqarneq ajortut.

Aammattaq imm 1-imi allassimasut atuutsinneqarsinnaanngillat arlaatigut isumannaallisaanermut sillimmasiisoqarsinnaatinnagu.

Takornarissanut neqerooruteqarnissamut akuersissummik qinnuteqarnermut atatillugu siunnersuummi § 6-imi allassimasut malillugit qinnuteqartup Naalackersuisut noqqaassuteqarneratigut neqeroorutaasut pineqartut pillugit inuussutissarsiutilinnut sillimmasiisoqarsinnaanngitsoq allatigulluunniit isumannaallisaanermut sillimmaserneqarsinnaannginneq uppernarsassavaa. Uanilu aamma allanneqarsimavoq Naalackersuisut takornarissanut sullississutaaniartoq pillugu inuussutissarsiutilinnut sillimmaserneqarsinnaanermut periarfissaqarnersoq nalornissutigigunikku taamaallaat Naalackersuisut uppernarsaaseeqqusissasut, taamaattoqarsinnaavorlu akuersissut pillugu qinnuteqaammik suliaqarnissamut tamanna pisariaqartinneqarpat.

Imm. 3-mut

Siunnersuummi aalajangersakkat aallaavigalugit Naalackersuisut immikkut sillimmaserneqarnissamut isumannaallisaanerlu pillugu sillimmateqarnissamut piunasaqaatinik aalajangersaasinnaapput. Assersuutigalugu tamanna pisinnaavoq takornarissanut neqeroorutaasoq ajutoortoqarnissaanut navianaataasoq annertuppat, taamaattoqarpallu takornarissanut annaassiniarnissamut allatigulluunniit upalungaarsimanermi suliarineqartussanut aningaasartuutinut sillimmaserneqarsimanissaq piunasaqaataasinnaavoq.

§ 16 -imut

Aalajangersakkami akuersissummi allassimasut malillugit sulinermut ingerlatsinermulluunniit atatillugu Naalakkersuisut kalaallinik sulisitsisinnaanermut allatigulluunniit kalaallinik suliaqartitsisinnaanermut aalajangersaasinnaanerat periarfissinneqarpoq.

Aalajangersakkamittaaq akuersissummi allassimasut malillugit sulinermut ingerlatsinermulluunniit atatillugu Naalakkersuisut kalaallinik pilersuisunit nioqqutissanik kiffartuussissutinilluunniit atuinissamut aalajangersaasinnaanerat periarfissinneqarpoq.

Taamannak aalajangersaanerup siunertaa Kalaallit Nunaanni suliffissanik amerlanerusunik pilersitsinissaq ineriartornissarlu. Naalakkersuisulli siunertarinngilaat sumiiffummi najugaqartunik sulisinnaasunik pilersuisinnaasunilluunniit atuinissamut periarfissaqarfiumngitsumi piviusunngortitsiffiusinnaanngitsumilu piumasagaatinik atuutsitsinissaq.

§ 17-mut

Imm. 1-imut

Pisinnaatitsissummik piginnittoq suliaininik aallartitsigani akuersissut aallaavigalugu takornarissanut neqeroortigisassani pillugit ingerlatsinissamut pilersaarusiortoqartariaqartoq, taannalu Naalakkersuisunit akuerineqaqqaartariaqartoq siunnersuummi aalajangersarneqarsimavoq.

Ingerlatsinissamut pilersaarummi ingerlatsinissamut aammalu illuutininik sanaartukkanik assigisaannillu atuinissamut pilersaarutit allassimassapput.

Imm.2-mut

Siunnersuummi ingerlatsinissamut pilersaarusiaq qanoq sinaakkuserneqassanersoq aalajangersarneqarsimavoq. Akuersissutip imarisaa aallaavigalugu suna naapertuuppa, akuersissutinillu aalajangersimasunik nalilersuinermi eqqarsaatigineqassaaq suut ingerlatsinissamut pilersaarummi nalunaarsorneqartariaqarnersut.

Siunnersuummi allassimasut aallaavigalugit ingerlatsinissamut pilersaarummi suliniutip ineriartortinnissaanut anguniakkat nassuiarneqarsimassapput.

Aappaattut ingerlatsinissamut pilersaarummi naapertuussuseq aallaavigalugu akuersissummik ingerlatsinissamut atatillugu pilersaarutit qanoq aallartisarniarneqassanersut, illunik, sanaartukkanik assigisaannillu qanoq atuisoqassanersoq nassuiarneqassaaq. Ingerlatsinissamut pilersaarummi allassimasut aallaavigalugit ingerlatsinissamut illuutininik assigisaannillu nutaanik sanaartortoqartariaqartoq ilaatigut allanneqarsinnaavoq.

Pingajuattut ingerlatsinissamut pilersaarummi akuersissummik ingerlatsinissamut atatillugu § 2-mi imm. 6-imi allassimasut malillugit kalaallini sulisinnaasunik atuinissaq aammalu § 2-mi imm. 7-mi allassimasut malillugit kalaallinik nioqqutissanik kiffartuussissutinillu pilersuisunik qanoq atuisoqassanersoq nassuiarneqassaaq. Ingerlatsinissamut pilersaarummi allassimasut aallaavigalugit ingerlatsinissamut kalaallit sulisorisassat sulisorisassatulluunniit naatsorsuutigisat qanoq amerlatigissanersut nassuiarneqarsinnaavoq.

Sisamaattut ingerlatsinissamut pilersaarummi naapertuussuseq aallaavigalugu akuersissummik ingerlatsinissamut atatillugu sillimaniarnermut piumasagaatit qanoq naammassineqassanersut nassuiarneqassaaq. Nassuiaat suliarineqartussaq siunnersuummi § 14-imi sillimaniarnermut pilersaarummut atatillugu suliaqarnertut isigineqassaaq, tassanilu assersuutigalugu naapertuutsillugu ingerlatsinissamut pilersaarummit sillimaniarnermut pilersaarummut innersuussisoqarsinnaavoq.

Tallimaattut ingerlatsinissamut pilersaarummi naapertuussuseq aallaavigalugu akuersissummik ingerlatsinissamut atatillugu pisinnaatitsissummik piginnittup suliasai suleriuusissaalu aalajangersimasut nassuiarneqassapput, tassanilu qulakkeerniarneqartoq tassaavoq pisinnaatitsissummik piginnittoq, pisinnaatitsissummik piginnittup sulisui, suleqatigisat, takornarissat inuillu allat ajoqusernissaminut navianartorsiunnginnissaat. Nassuiaat suliarineqartussaq siunnersuummi § 14-imi sillimaniarnermut pilersaarummut atatillugu suliaqarnertut isigineqassaaq, tassanilu assersuutigalugu naapertuutsillugu ingerlatsinissamut pilersaarummit sillimaniarnermut pilersaarummut innersuussisoqarsinnaavoq.

Arfernattut ingerlatsinissamut pilersaarummi pisinnaatitsissummik piginnittup pinngortitamut illersuinissamut, avatangiisinut illersuinissamut, aalisarnermut aamma pisiniarnermut aammalu sulinermut ataatsimullu isumaqatigiissutaasunut pisussaaffinnut qanoq naammassinninniarnersoq nassuiarneqassaaq. Tassani ilaatigut pisinnaatitsissummik piginnittup piumasagaatinut pineqartunut naammassinninnissaminut qanoq ingerlatsiniarnersoq nassuiarneqarsinnaavoq.

Arfineq-aappaattut ingerlatsinissamut pilersaarummi pisinnaatitsissummik piginnittup akuersissuteqarnerup unitsinneqarnerata kingorna avatangiisinut qanoq aaqeeqqinniarnera nassuiarneqassaaq. Tassani ilaatigut akuersissuteqarneq aallaavigalugu ingerlatsinermi sunnerneqarsimasut pillugit pisinnaatitsissummik piginnittup aaqiissuteqarniarnera nassuiarneqarsinnaavoq. Unalu pingaaruteqarpoq suliarissallugu, takornarissanut neqeroorutaasimasoq avatangiisinut ajoqusiisimatillugu.

Imm. 3-mut

Pissutsit allanngorneri peqquataallutik ingerlatsineq allanngussappat, imaluunniit illunik sanaartukkanilluunniit atuineq allanngussappat, taava pisinnaatitsissummik piginnittoq siunnersuummi matumani allassimasut malillugit ingerlatsinissamut pilersaarummik nutartikkamik Naalakkersuisunut akuerisassanngorlugu nassiussissaaq.

Siunnersuummi allassimasut malillugit allannguutit annikissimappata, taava ingerlatsinissamut pilersaarummik nutaamik nassiussisoqarnissaa piumasaqaataangilaq. Imaassinnaavoq anguniagassatut pilersaarutaasut imm. 2-mi nr. 1-imi allassimasut aaqqilaagassaasut, imaluunniit imm. 2-mi nr.2-mi allassimasut aallaavigalugit illunik atuineq allannguuteqartoq. Taamaakkaluartoq ingerlatsinissamut pilersaarummi allassimasut sillimaniarnermut piumasaqaatit appariaateqassagaluarpata nutaamik pilersaarusiortoqartariaqartassaaq, taannalu akuerisassanngorlugu nassiunneqassaaq.

Pilersaarut nutaaq Naalakkersuisunut akuerisassanngorlugu piaartumik nassiunneqassaaq, allanngortoqarneraniillu qaammatit pingasut iluanni nassiunneqarsimassalluni. Naalakkersuisulli piffissaliussaq sivitsorsinnaavaat. Taamaattoqarsinnaavoq pisinnaatitsissummik piginnittoq Naalakkersuisunut oqaatigisimaguniuk nutaamik pilersaarusiortoqartariaqartoq, pilersaarummillu nutaamik suliaqarnissaq eqqarsaatigalugu Naalakkersuisut isumaqarunik piffissaq sivilisunerusoq atorneqassasoq, imaluunniit Naalakkersuisuni suliap ingerlanneqarnissaa ima sivilisutigissappat, ingerlatsinissamut pilersaarut allanngugaq piffissap killiliussap iluani naammassineqarsinnaani.

§ 18-mut

Imm. 1-mut

Aalajangersakkami pisinnaatitsissummik piginnittut takornarissanut neqerooruteqarsinnaanermut akuersissummut atatillugu ingerlatsisimaneq pillugu ukiumut Naalakkersuisunut nalunaaruteqartarnissaat aalajangersaaffigineqarpoq.

Pisinnaatitsissummik piginnittup nalunaaruteqartussaataitanerminut tulliuuttut nalunaarutigissavai:

- 1) Takornarissanut neqerooruteqarsinnaanermut akuersissut aallaavigalugu ingerlatat amerlassusaat,
- 2) Takornarissanut neqerooruteqarsinnaanermut akuersissut aallaavigalugu takornarissat sullinneqartut amerlassusaat,
- 3) Pisinnaatitsissummik piginnittup sulisuisa, tassunga ilanngullugit kalaallit, amerlassusaat,
- 4) Pilersuisunik, tassunga ilanngullugit kalaallit, atuineq,
- 5) Pisut siunnersuummi § 14-imi allassimasut aallaavigalugit sillimaniarnermut pilersaarummik allannguisariaqarnermut eqqarsalersitsisinnaasut, aammalu

6) Siunnersuummi § 17-imi allassimasut malillugit ingerlatsinermut pilersaarummi killiffiit

Imm. 2-mut

Siunnersuutigineqartumi Naalakkersuisut nalunaaruteqarneq pillugu sukumiinerusumik aalajangersaasinnaanerat aalajangersarneqarpoq. Malittarisassani ilaatigut nalunaaruteqarnermi paasissutissat suut ilanngunneqassanersut qanorlu akulikitsigisumik nalunaaruteqartoqartassanersoq allanneqarsinnaapput. Imaassinnaavoq akuersissutit aalajangersimasut pillugit kvartalikkaartumik nalunaaruteqartoqartassasoq, akuersissutillu allat sukumiinerusumik nalunaarutigineqartassasut. Aalajangersaanermi assersuutigalugu qaqugukkut nalunaaruteqarnissaq killeqartinneqassanersoq aalajangersarneqarsinnaavoq.

Siunnersuutigineqartoq aallaavigalugu Naalakkersuisut nalunaarusiorsinnaapput, tassanilu akuersissutit assigiinngitsut qanoq nalunaarutigineqartarnissaat aalajangersaaffigineqarsinnaavoq. Assersuutigalugu heliskiingertitsisinnanermut akuersissummut aammalu illuaqqamut akuersissuteqarsinanermut nalunaarusioriaatsit assigiinngissinnaapput. Aalajangersagaq aallaavigalugu nalunaaruteqarnissamut piumasaaqatit suliarineqarnissaat tunngavilersorneqarpoq.

§ 19-mut

Imm. 1-mut

Sunnersuummi § 18-imi allassimasut aallaavigalugit nalunaaruteqarmit paasissutissat pissarsiarineqartut Naalakkersuisunit pisorta qarfinnut allanut Namminersorlutillu Oqartussat suliffeqarfiutaannut siammarterneqarsinnaanerit aalajangersaaffigineqarpoq.

Pisorta qarfinnut allanut Namminersorlutillu Oqartussat suliffeqarfiutaannut siammarterineq pissaaq akuersissummik pineqartumik suliaqarnermut atatillugu. Assersuutigalugu kommuneqarfiup iluani akuersissutinut atatillugu ingerlatsinerit pillugit kommunit oqaloqatigineqarsinnaapput.

Imm. 2-mut

Siunnersuutigineqartumi takornarissanut neqerooruteqarsinnaanerit akuersissutit aallaavigalugit naatsorsuutinik Naalakkersuisut saqqummiussisinnanerat aalajangersaaffigineqarpoq. Naatsorsuutinik tamanut saqqummiussisoqartillugu paasissutissat nipangiussisimasussaataaernerit illersorneqarsimasut saqqummiunneqaqqusaanngillat.

§ 20 -mut

Imm. 1-mut

Aalajangiussassatut siunnersuutaasoq akuersissuteqarnermut atatillugu akitsuutitut akiliisarnissamut attuumassuteqarpoq. Takornarissanik inuussutissarsiorsinnaanermut sumiiffinni kisermaassilluni ingerlatsisinnaanerup nunatta karsianut isertitsissutaanissaa akitsuusiinikkut qulakkeerneqassaaq.

Takornarissanut neqeroorsinnaanermut akuersissuteqarnikkut akitsuutitut akiliisussaatitaaneq aallartittarpoq, akiliinissamullu kingusinnerpaamik ulluliussaq tassaalluni ukioq akitsuutitut akiliiffiusussami decembarip naanera.

Imm. 2-mut

Takornarissanut neqeroorsinnaanermut akuersissuteqarnerup aallartinnerani akitsuummik akiliisussaatitaaneq aallartissasoq siunnersuutigineqarpoq.

Imm. 3-mut

Akitsuutitut akiliinissamut kingusinnerpaamik ukioq akitsuutitut akiliiffiusussami decembarip naanera ulluliunneqarpoq.

§ 21-mut

Imm. 1-mut

Siunnersuummi akiliilluni aalisartitsisartunut akuersissutit akitsuutitaat akuersissutinullu allanut akitsuutit assigiinnginnissaat siunnersuutigineqarpoq. Taamannak aaqqiinermi peqqutaavoq, nunani allani, assingusunik neqerooruteqarfiusuni, akitsuutip inissisimaffia, taannalu assigalugu akitsuut inissinneqarpoq.

Akiliilluni aalisartitsisinnaanermut akitsuummi tunngaviusumik aammalu ilassummik akitsuuteqarnissaa siunnersuutigineqarpoq.

Imm. 2-mut

Ukiumut tunngaviusumik akitsuut 2.500 kr.-iunissaa siunnersuutigineqarpoq.

Imm. 3-mut

Ilassutitut akitsuutit inummut ataatsimut ullormut 130 kr.-iunissaa siunnersuutigineqarpoq.

Imm. 4-mut

Inatsisartut inatsisaanni nr. 9 1. Juni 2017-imeersoq aallaavigalugu aningaasat annertussusaat ukiumut annertussuseq procentinngorlugu naleqqussaataasartussaq atorlugu aaqqiissuteqartoqartassaaq. Siunnersuummi § 18 imm. 4-mi allassimasut aallaavigalugit aaqqiissut siullesq 1. januaari 2026 pissaaq.

§ 22-mut

Imm. 1-mut

Siunnersuummi akiliilluni aalisartitsisartunut akuersissutit akitsuutitaat akuersissutinullu allanut akitsuutit assigiinnginnissaat siunnersuutigineqarpoq. Taamannak aaqqiinermi peqqutaavoq, nunani allani, assingusunik neqerooruteqarfiusuni, akitsuutip inissisimaffia, taannalu assigalugu akitsuut inissinneqarpoq.

Akuersutinut allanut akitsuut, tassa § 21-mi akuersissutinut attuumassuteqanngitsunut, akitsuusiinissaq siunnersuummi matumani aalajangersaaffigineqarpoq. Akitsuutillu ukiumut 7.500 kr.-iunissaa siunnersuutigineqarpoq.

Imm. 2-mut

Inatsisartut inatsisaanni nr. 9 1. Juni 2017-imeersoq aallaavigalugu aningaasat annertussusaat ukiumut annertussuseq procentinngorlugu naleqqussaataasartussaq atorlugu aaqqiissuteqartoqartassaaq. Siunnersuummi § 18 imm. 4-mi allassimasut aallaavigalugit aaqqiissut siullesq 1. januaari 2026 pissaaq.

§ 23-mut

Imm. 1

Siunnersuummi pisinnaatitsissummik piginnittup suliap ingerlanneqarneranut allatigullu pisorta qarfinni sullissinermut atatillugu Naalakkersuisut akiitsuusiisinaanannut aalajangersaasinnaanermut pisinnaatitaaffiat tunngavilerneqarpoq.

Imm. 2

Siunnersuut aallaavigalugu aningaasartuutit akitsuutinngorlugit matussuserneqarsinnaapput, taamaaliortoqarsinnaavorlu akiliutaasussaq Naalakkersuisut sullissinerannut aningaasartuutaasut assigippassuk.

Siunnersuummi allassimasut aallaavigalugit akitsuut tassaavoq pisorta qarfiup pisorta qarfimmi sullissinerminut atatillugu aningaasartuutissatut naatsorsuutigisaa. Pisorta qarfinnut suliamik suliarinnittuusunut allatigulluunniit pisorta qarfinni suliaqarnermi, tassunga ilanngullugu nakkutilliineq, akuersissutinik nalunaaruteqarneq akuersissuteqarnerlu, akiliineq akunnerit atornerqartut aallaavigalugit, akunnermut akiliut atorlugu akiliisoqartarsinnaavoq.

§ 24-mut

Imm. 1

Siunnersuummi Naalakkersuisut nakkutilliisussaataa nerat aalajangersaaffigineqarpoq. Naalakkersuisut takornarissanut neqeroorutinik, pisinnaatitsissummik piginnittunut, ingerlatanut allanullu inatsisartut inatsisaat una atorlugu ingerlanneqartunut nakkutilliisussaavoq.

Imm. 2

Nakkutilliinermut atatillugu Naalakkersuisut aalajangersaasinnaanerat siunnersuummi matumani aalajangersaaffigineqarpoq.

Aalajangersagaq tunngavigalugu ilaatigut Namminersorlutik Oqartussat kommunillu ataaniittut pisorta qarfiit sulia saqarfiillu nakkutilliineq pillugu sulianik ingerlatitseqqii viusinnaapput. Tunngaviusumik Naalakkersuisut aalisarnerup piniarnerullu iluani nakkutilliinerup kommuninut ingerlateqqinneqarsinnaanera pillugu taamak aalajangersaasoqarpoq. Kommuninut ingerlatitseqqiinermi, kommuninut akuersissuteqarfiusuni suliap suliarisinnaanissaa pineqarpoq.

§ 25-mut

Imm. 1

Siunnersuummi peqqussuteqarsinnaaneq aalajangersaaffigineqarpoq. Inatsisartut inatsisaanni allassimasunik, inatsisartut inatsisaanni matumani aalajangersakkanik imaluunniit akuersissutinut piumasaqaatinut naammassinninnginneq tunngavigalugu aalajangersakkanik piumasaqaatinilluunniit malinneqqusinermut peqqussusior toqarsinnaavoq.

Peqqussutit pisinnaatitsissummik piginnittumut allanullu inatsisartut inatsisaannut matumunnga attuumassusilinnut nalunaarutigineqassaaq.

Akuersissummik piginnittut assigisaallu peqqussummik nalunaarfigineqarsimasut, siunnersuut aallaavigalugu Naalakkersuisut killiliinerat malillugu pissutsinut inatsisartut inatsisaanni allassimasunik, inatsisartut inatsisaanni matumani aalajangersakkanik imaluunniit akuersissutinut piumasaqaatinut naammassineqarsimangitsunut aaqeeqquneqarsinnaapput.

Imm. 2

Naalakkersuisut akuersissummik piginnittunut peqqussuteqarnerat malillugu pisinnaatitsissummik piginnittoq aaqqiisuteqanngippat, takornarissanut neqeroorsinnaanermut akuersissummik utertitsinissamut aalajangiisinnaapput.

Akuersissummik utertitsisoqarnissaanut aalajangiiniarneq Naalakkersuisut naliliinerannit tunngaveqassaaq, tassanilu unioqutitsisoqarnerani peqqussutip annertussusaa isiginiarneqassaaq. Siunnersuummi § 7-mi imm. 1-imi allassimasut aallaavigalugit

nalilersuinissamut ataatsimiititaliaq pilersinneqarsimappat, taava ataatsimiititaliaq inassuteqaasiornissamik noqqaaffigineqarsinnaavoq.

Siunnersuut una tunngavigalugu Naalakkersuisut takornarissanut neqerooruteqarsinnaanermut akuersissummik utertitsisinnaapput, takornariaqarnermik suliaqartup peqqussut arlaleriarluni tusaanngitsuusaarsimappagu. Utertitsineq nalinginnaasumik pisortat ingerlatsineranni suliassat suliarineqartarneranni atorneqartut malillugit pissaaq.

Imm. 3

Takornariaqarnermut akuersissutinik utertitsisarneq pillugu Naalakkersuisut aalajangersaasinnaanerat siunnersuummi pineqarpoq. Pisuni aalajangersimasuni utertitsisoqartarnissaa, imaluunniit suleriaaseq pillugu malittarisassat, utertitsinermullu atatillugu atugassarititaasut aalajangersakkami ilanngunneqarsinnaapput.

§ 26-mut

Imm. 1

Pisinnaatitsissummik piginnittup piffissap akuersissuteqarfiusup naanerata kingorna pisinnaatitaaffeqarnissaanut Naalakkersuisut aalajangersaasinnaanerat uani aalajangersaaffigineqarpoq.

Aalajangersagaq aallaavigalugu pisinnaatitsissummik piginnittup piffissaq akuersissuteqarfiusup naanerani pisussaaffii suut ataannassanersut suullu pisussaaffigilerumaarnerai Naalakkersusiut aalajangersaaffigisinnaavaat.

Aalajangersaanermittaaq pisinnaatitaaffimmik piginnittup akuersissuteqarneq malillugu ingerlatsiunnaaruni, illunik, sanaartukkanik assigiinngitsunillu pisinnaatitaaffimmik piginnittup suliarisimasaanik kiisalu sumiiffinni pineqartuni ikkussuussimasaanik peersinissamut attuumassusilinnik aalajangersaasoqarsinnaanera allanneqarpoq. Aalajangersakkani sumiiffik akuersissuteqarfiusoq akuersissutip atorunnaarnerata kingorna utertinneqassanersoq aamma aalajangersaaffigineqarsinnaavoq.

Pisinnaatitsissummik piginnittumut pisussaaffeqarsinnaavoq, tassanilu ilaatigut sumiiffimmi pineqartumi avatangiisit uterteqqinneqarnissaannut attuumassutilinnik iliuseqaqqusisoqarsinnaavoq, tamannalu pisinnaavoq assersuutigalugu sumiiffik takornarissanut neqerooruteqarsinnaanermut akuersissuteqartoqarnerata nalaani ajoqusersimappat.

Kiisalu pisinnaatitsissummik piginnittup naggasiutigalugu Naalakkersuisunut nalunaaruteqartussaataitaanerani pisussaaffiliinermik aalajangersaasoqarsinnaavoq.

Imm. 2

Aalajangersakkami ingerlatsinissamut pilersaarummut imaluunniit ingerlatsinissamut pilersaarummi allannguinermi Naalakkersuisut akuersissuteqarnerminnut atatillugu § 17-imi allassimasut malillugit imm. 1-imi piunasaqaataasunut naammassinninnissamut pisinnaatitsissummik piginnittumut aalajangersaasinnaapput, tassunga ilanngullugu sillimmateqarnissaq.

Allanngortoqartillugu Naalakkersuisut piunasaqaatinik allaanerusunik aalajangersaasinnaapput, sillimmateqarnissamut attuumassusillit ilanngullugu.

Aalajangersimasumik sillimmateqarnissamut assersuutigalugu ingerlatap annertussusaa, pisariussusaa, navianaataa assigisaallu aallaavigalugit inissinneqassaaq.

Imm. 3

Siunnersuummi pisinnaatitsissummik piginnittup Naalakkersuisut peqqussuteqarnerannik naammassinninnani, Naalakkersuisut pisinnaatitsissummik piginnittup akiligassaannik sumiiffimmi saliisitsisinnaanerannik assigisaannillu aalajangersarneqarpoq. Taamaaliortoqassagaluarpalli § 25 imm. 1-imi allassimasut malillugit pisinnaatitsissummik piginnittoq saliinissamut peqquneqaqqaarsimassaaq.

§ 27-mut

Imm. 1

Siunnersuummi pisut Kalaallit Nunaanni pinerluttulerinermi inatsimmi malittarisassat malillugit akiligassiissutaasinnaanersut aalajangersarneqarsimapput

Aalajangersakkami ima iliortoq akiligassinneqarsinnaavoq:

1) Akuersissummik atuuttumik pigisaqarani takornarissanut akiliisitsilluni neqerooruteqarnikkut § 4, Imm. 1-mi allassimasunik unioqqutitsisoq.

Takornarissanut neqerooruteqarsinnaanermut akuersissut aallaavigalugu ingerlatsissagaanni, pisinnaatitsissummik piginnittoq atuuttumik akuersissummik peqarnissaa piunasaqaataavoq. Aalajangersakkami inatsisartut inatsisaanni siunertat atuuffiilu qulakkeerniarneqarput.

2) Pisortaqarfinnut eqqunngitsunik paasissutissiinikkut imaluunniit pututitsiniuteqarnikkut § 6 imm. 1-imi allassimasunik unioqqutitsisoq.

Takornarissanut neqerooruteqarnissamut akuersissummik qinnuteqaatinik suliaqarnissamut ammalu siunnersuummi matumani allassimasunut nakkutilliinissamut paasissutissat eqqortumik tunniunneqarnissaasa pisariaqartinneqarnera tunngavigalugu aalajangersagaq una ikkunneqarsimavoq.

3) Takornarissanut neqerooruteqarsinnaanermut akuersissut malillugu suliarineqartut pillugit nalunaaruteqartussaaitaanermut atuutsitsinnginnikkut § 18 imm. 1-imi allassimasunik unioqqutitsisoq.

Imm. 2

Siunnersuummi Inatsisartut inatsisaat aallaavigalugit maleruagassiani, pineqaatissiissutitut akiligassiisoqarsinnaanera aalajangersaaffigineqarpoq.

Maleruagassat § 3-mi, § 4, Imm. 5-imi, § 6, Imm. 2-mi, § 15, Imm. 3-mi, § 16 aamma § 18, Imm. 2-mi allassimasut pineqarput.

Imm. 3

Siunnersuummi Inatsisartut inatsisaanni maleruagassaniluunniit inatsisartut inatsisaat tunngavigalugu suliarineqarsimasuni akiliisitsiniarnermi akiligassaq inatsisitigut inunnet Kalaallit Nunaanni pinerluttulerinermi inatsimmi atuuttumi malittarisassat malillugit akiligassiissutigineqarsinnaasoq aalajangersarneqarpoq.

Imm. 4

Inatsisartut inatsisaat aallaavigalugu akiligassiinermut tunngatillugu siunnersuummi allanneqarsimavoq akiligassat tunniunneqartut nunatta karsianut nakkartinneqassat.

Imm. 5

Siunnersuummi aallaavigalugu Imm. 5. 4, Imm. 1-mik, § 6, Imm. 1-mik, § 18, Imm. 1-mik imaluunniit § 3-mi, § 4, Imm. 5-imi, § 6, Imm. 2-mi, § 15, Imm. 3-mi, § 16 aamma § 18, Imm. 2-mi allassimasut malillugit aalajangersakkanik unioqqutitsisut Kalaallit Nunaanni pinerluttulerinermi inatsimmi atuuttumi malittarisassat malillugit arsaarinnissuteqartoqarsinnaavoq.

§ 28-mut

Imm. 1

Siunnersuummi allassimasut aallaavigalugit Inatsisartut inatsisaat 1. januaari 2025 atortuulersinneqassaaq.

Imm. 2

Siunnersuutigineqarpoq Sumiiffinni nunami aalajangersimasuni takornariartitsinermut akuersissuteqartarnissaq pillugu Inatsisartut inatsisaat atorunnaarsinneqassasoq.

Imm. 3

Siunnersuutigineqarpoq Inatsisartut inatsisaata atortuulerfiani takornarialerisunut akuersissutit nalunaarutigineqartut atuutiinnassasut. Akuersissutit pineqartut Sumiiffinni nunami aalajangersimasuni takornariartitsinermut akuersissuteqartarnissaq pillugu Inatsisartut inatsisaanni aalajangersakkat malillugit aalajangersarneqassapput.

Imm. 4

Siunnersuutigineqarpoq Inatsisartut inatsisaanni § 21 imm. 4-mi aammalu § 22 imm. 2-mi allassimasut aallaavigalugit aningaasat annertussusaat ukiumut annertussuseq procentinngorlugu naleqqussaataasartussa q atorlugu aaqqiissuteqartoqartassasoq. Tamannalu siullermik pissaaq 1. januaari 2026.